

四庫全書

集部

欽定四庫全書

史部

甘肅通志卷四十七

詳校官監察御史臣李陽城

檢討臣德生覆勘

總校官檢討臣何思鈞

校對官中書臣葉炎

繕錄監生臣龔果

欽定四庫全書

甘肅通志卷四十七

藝文

記

唐裴度西平王李公碑記 惟天錫成命於我唐保茲
國祚生此大傑則西平王李公其是乎不然何覆暴
如風振槁葉戴君若鰲冠靈山橫流之中一匡而定
公諱晟字良器其先隴西人徙京兆曾祖嵩皇岷州

刺史祖思恭皇洮州刺史贈幽州大都督考欽皇金
吾衛大將軍隴右節度經畧副使贈太子太保代有
名跡雄於西土公幼好學學不為人及讀呂張孫吳
之書慨然有經邦濟物之志未弱冠遊秦涼間元侯
宿將見者咸器異之乾元初嘗客武都值渠豪以缺
守搆亂殺畧平人公與所從十數騎馳而射之殪其
為魁者餘黨遂遁寇所擄獲積如丘山公一無所取
椎牛醢酒享士而去邦人感服具狀以聞特拜左清

道率飾金紫將朝京師自獻方畧寇盜紛擾有土急
賢河隴將帥相繼表用歷二府右職所至常以才謀
為其委重累遷至光祿太常卿階爵在第一品涇原
四鎮北庭節度都知兵馬使懸識寇態周知地形應
變不窮有奪有予驥驟庭而莫展雲出岫而斯飛代
宗徵以左金吾衛將軍為神策兵馬使屬羗蠻犯蜀
朝廷濟師命公督禁旅絕棧道而往救焉公銜枚過
險出賊不意連下堅壁遂誅首惡還授檢校太子賓

客且復舊職建中二年田悅以魏叛德宗極意致討
悉起徂征以公為神策先鋒都知兵馬使加御史中
丞與河東河南等道諸軍合擊公濟河而行能以衆
正及破洹水陣解臨洺圍轢魏屬城抵燕通邑其摧
鋒衄銳皆先羣帥而勦力焉遙拜左散騎常侍兼御
史大夫厥功未成聞賊汎肆逆皇居失守西嚮慟哭
載馳載驅行及代北授檢校工部尚書充神策行營
節度公提孤軍募散卒拊循訓勵以達行在值懷光

中叛大駕再遷加檢校右僕射餘如故尋轉左僕射
同平章事兼京兆尹神策軍京畿鄜坊節度觀察管
內及商華等州副元帥公固守渭城決平秦壘調食
制用先發我私捐甘攻苦皆自我始每一言一誓聲
淚俱發勇夫義士感而使之幾不濟矣時自雍而東
延於汝洛震於河汴所在征鎮亂掠相從公介巨盜
之間使聲援斷絕立成師之法致號令嚴肅蒐補十
旬指揮一舉乘墉壑而通軌道礫梟獍以清宮禁俾

九市三條無輟肆之驚無秋毫之犯羽書速告鑾輅
爰歸廓氛祲為祥光攄憂憤為喜氣詩曰允矣君子
展也大成斯之謂歟考古視今論功稱忠者多矣若
至危而安至難而易卓犖跨邁如公莫儔拜司徒兼
中書令俄以允孳未寧邊防猶警岐下任重乃以本
官兼鳳翔尹鳳翔隴右節度觀察使及四鎮北庭涇
原等州副元帥改封西平郡王加食邑實封至一千
五百戶公名懾遐方政和蕃部始至而生植少安而

訓齊逮四載賦輿十倍其初會詔入輔拜太尉中樞
如故或謂公勲望已高寵渥已極宜從容頤養稍稍
遜避公曰不然人臣外則盡力內則盡心若止偷榮
孰為且哲故每承帷幄之間則言弗無隱理奪不回
大指以東夏可平西陲可復或已行而事終不顯或
未用而身遽不遺以貞元九年八月四日薨於位春
秋六十七德宗撫几哭於寢次自都邑達闕畿無士
庶無老幼皆發哀相弔則曩時安人戢兵之德可謂

決於元元之骨髓矣明贈太師賻贈加等以其年十二月十六日葬於高陵縣奉正原鄭國夫人杜氏祔焉自捐寢至安宅皆上所辦護中貴反覆萬情所奉如不及焉嗚呼以公之靖難扶傾不言所利雖存歿極位始終殊禮而天意若曰其福享未至故遙延於後有子曰愿故檢校司空河中節度等使贈司徒五列雄鎮三為上公曰聰故光祿司主簿曰摠故太子中允贈兵部郎中曰懸左神武大將軍贈洪州都督

曰恕故光祿卿贈右散騎常侍曰憑故右威衛大將軍曰憲檢校左散騎常侍嶺南觀察等使進因貴胄達以善政曰愬故檢校左僕射同中書門下平章事贈太尉克廣前脩仍執醜逆曰懿故渭南尉曰聽檢校司徒義成軍節度使統戎安俗是以似之曰憇右羽林將軍曰慙嵐州刺史並地勢吏用兼而有焉粵太和元年秋七月聽拜疏上言以公之徽烈則御製碑文於渭川矣以公之風度則詔命圖形於靈臺矣

惟大其立隴鬱彼松檟望有祁山之象拜無峴首之
碑將刊貞石式表幽隧乃命臣度稱代言詩其詞曰
建中季年大盜忽焉皇輿避寇狩於梁川顧謂太師
汝才汝畧將威致討必殄寇虐太師泣奉捐軀誓衆
度其成城可以利用赫矣墉壑傳於牆垣手搏足跡
如衝如援一鼓而破一麾而奔掃清宮闈刷蕩妖昏
我師蒞止我令行矣都人不知已事方喜飛章告慶
飭駕言旋鴻烈耀古謹聲動天車服之錫河山之誓

九命而俯一心若厲俾侯於岐阜安邊陲藩政既成
袞職攸宜嶽降帝賚矢言危詞我后嘉猷我躬何為
道直氣和勞謙終吉福履所綏未至萬一上天不惠
厚宥端歸垂裕流光用延恩暉翼子承家將壇台席
繼立竒功代傳休績聽與伯仲永懷高蹤請於朝廷
表是丘封帝曰孝哉胡可不從宣我祖之丕業繫爾
父之嘉庸乃詔作銘以觀億齡

韓愈故相國權公碑 上之元和六年其相曰權公

諱德輿字載之其本出自殷帝武丁武丁之子降封
於權權江漢間國也周衰入楚為權氏楚滅徙秦而
居天水畧陽苻秦之王中國其臣有安丘公翼者有
大臣之言後六世至平涼公文誕為唐上庸太守荆
州大都督長史焯有聲烈平涼曾孫諱倕贈尚書禮
部郎中以藝學與蘓源明相善卒官羽林軍錄事參
軍於公為王父郎中生贈太子太保諱皋以忠孝致
大名去官累以官徵不起追謚貞孝是實生公公在

相位三年其後以吏部尚書授節鎮山南年六十以
薨贈尚書左僕射諡文公公生三歲知變四聲四歲
能為詩七歲而貞孝公卒來弔哭者見其顏色聲容
皆相謂權氏世有其人及長好學孝敬祥順貞元八
年以前江西府監察御史徵拜博士朝士以得人相
慶改左補闕章奏不絕譏排姦倖與陽城為助轉起
居舍人遂知制誥凡撰命詞九年以類集為五十卷
天下稱其能十八年以中書舍人典貢士拜尚書禮

部侍郎薦士於公者其言可信不以其人布衣不用
即不可信雖大官勢人交言一不以綴意奏廣歲所
取進士明經在得人不以員拘轉戶兵吏三曹侍郎
太子賓客復為兵部遷太常卿天下愈推為鉅人長
德時天子以為宰相宜參用道德人因拜禮部尚書
同中書門下平章事公既謝辭不許其所設張舉措
必本於寬大以幾教化多所助與維匡調娛不失其
正中於和節不為聲章因善與賢不矜主己以吏部

尚書留守東都東方諸帥有利病不能自請者公常與疏陳不以露布復拜太常轉刑部尚書考定新舊令式為三十編舉可長用其在山南河南勤於選付治以和簡人以寧便以疾求還十三年某月甲子道薨於洋之白草奏至天子痛傷為之不御朝郎官致贈錫官居野處上下弔哭皆曰善人死矣某年某月日葬於河南北山在貞孝東五里公由陪屬升列年除歲遷以至公宰人皆喜聞若已與有無忌嫉者于

頓坐子殺人失位自囚親戚莫敢過門省顧朝莫敢
言者公將留守東都為上言曰頓之罪既貫不竟宜
因賜寬詔上曰然公為吾行諭之頓以不憂死前後
考第進士及廷所策試士踵相躡為宰相達官與公
相先後其餘布處臺閣外府凡百餘人自始學至疾
未病未嘗一日去書不觀公既以能為文辭擅聲於
朝多銘卿大夫功德然其為家不視簿書未嘗問有
亡費不侍餘公娶清河崔氏女其父造嘗相德宗號

為名臣既葬其子監察御史璩纍然服喪來有請乃
作銘文曰權在商周世無不存滅楚徙秦嬴劉之間
甘泉始侯以及安丘詆訶浮屠皇極之扶貞孝之生
鳳鳥不至爵位豈多半塗以稅壽考豈多四十而逝
惟其不有以惠厥後是生相君為朝德首行世祖之
文世師之流連六官出入屏毗無黨無讐舉世莫疵
人所憚為公勇為之其所競馳公絕不窺孰克知之
德將在斯刻詩墓碑以永厥垂

卻昂岐邠涇寧四州八馬坊頌碑 垂象者元上昭
乎天廢天駟體元者聖下列乎庾人校人驥稱其德
亦已遠矣願言馬之志曾有意乎粵若乾道為良坤
元利北駒從涯水駮發中廬屈產貴其能鳴雁門多
其美脊豈止宗生冀北功施汧西而已哉自相士運
其天機孫陽明其骨性夫贊涖其前後許衛評其色
毛悲伐任其肢膚寒管議其唇齒麻朝訛其頰頰女
厲辨其目眸昔軒轅得之過寒門穆滿得之遊崑崙

周王得之平東鄰漢帝得之定西秦我高祖得之四方至我開元得之五輅備敢問毛蟲三百六十其誰力多於是乎夏殷以還經傳莫紀周制廢馬始頒厥官凡十二閑馬三千四百五十六始皇吞并宇內六萬騎之國馬盡歸秦漢武大脩甲兵崇飭戰馬至四十萬匹是多乎哉自魏及隋天下騷動勞疲死轉數不足徵我有唐之新造國也於赤岸澤僅得牝牡三千匹命太僕張萬歲傍隴右馴字之四十年間孳息

成七十萬六十匹屬張氏替職圉師敗官馬之教駢
日失其序逮開元初惟得二十四萬匹至十九年復
成四十四萬匹今之盈縮亦不甚過上耕籍之明年
命我邠公典斯馬政公齊其飲食視其良駑廩芻房
涼網惡去害天子以公有伯翳宜生之德爰錫土田
日磾圍養之功真堪宰相即召公入掌三事外司百
揆調飪鼎寶緝熙帝繇夷吾果理於高徯咎單謹暢
於伊尹帝曰若予邠之後亮采惠疇僉曰元祐帝曰

俞咨祐汝作小司空兼牧牧圉李公言成允令才實
允宗恪居本朝能率大憂載習載步稚之秣之疏穢
鎮浮受劑聽訟匪燒匪剔斯馬斯材荷天之寵未可
涯也判官尚乘奉御長孫勗壽安尉賀蘭弼華陰主
簿常冀並心懸規鏡家韞賜書授刃靡全應機立斷
侶昌門之驂乘行翼聖僊偕子況之能官坐登卿相
有原逐浦非大而何雅所謂愷悌君子干祿愷悌信
矣先是國家以岐山近甸幽土晚寒寧州壤甘涇水

流惡澤茂豐草地平鮮原當古公走馬之郊接非子
犬丘之野度其四境分署八坊其五在岐其餘在三
郡保樂第一蘓忠主之甘露第二劉義尸之南普潤
第三田敬董之北普潤第四邵業監之岐陽第五李
行守之太平第六馬慶尹之宜祿第七曾叡領之安
定第八李仙正之八人者或折衝禦侮或果毅嫻兵
射御不違始終惟一又命朝散大夫都苑總監韋績
總以統之韋公敢行利物克壯遠猷悉心效官盡瘁

事國口授諸吏躬親百為攻特執駒禁蠹驅蠶撫餼
趣馬慰薦扈人陳損益以示其方明賞罰以防其慢
立封準以程其課均衆寡以節其宜告之以畏威申
之以誘掖曰善而筐蠹蔽而瓔纓除而茲翦而益偕
當循爾職制無使我馬元黃抱公絕私匪怒伊教君
子曰韋公之慢下如此欲辭福祿得乎人從語言馬
賴調養將蕃其類必謹其初故春祭房星尊祖也夏
祭先牧尚養也秋祭馬社敬乘也冬祭馬步存神也

然後時其出入傾其肥羸一其種性殊其卓樞旌別
淑慝無相奪倫試言夫名且曰獻狀其名則汗血山
子桃騄綠耳金喙騰黃騶吾吉光蒲梢啓服野麋娥
鹿白蟻鷄斯蜚鴻母兒遺風腰褭茲白鐵離項王之
騅符主之駟桓氏之驄晉侯之駮魏公絕影唐國驕
驕劉之的顓呂之赤兔其狀則八尺之駮七尺之騄
六尺之駮三尺之果下文臂花肩陰唇白顛握腕作
足昆蹄素懸編形如練紫目如電有驪有騷有駟有

驍騁駘異羣驪駮亦分散如擣錦聚若屯雲若廼審
其容貌觀其尾鬣司其正骨鑑其回毛膺為宜桀肘
為咸陽幹為第方背為關光水火又明城郭又張逸
躍翹陸趨蹌謁顧陞巖巖草降阿飲沱騃而翔馭而
走如龍如彪或寢或叱鷁至特立仰鳴俯噴威儀變
態不可談羣田事既昭軍容大備有馬如此何憂乎
兵由是判官長上果毅都尉成公雅貞尹承順兼諸
寮吏及四郡齊人八方長戶因雜然相與謀曰天子

亭育我郊公覆露我李公司牧我韋公噢休我君臣
同德其利溥哉若不毛舉數事指牧大較雖隸圉之
後將不食其餘且保樂者隋石門馬坊也其舊制偏
狹多歷年所棟折榱摧墻填塹甘露先置在九成
苑外土良薦美不逮苑中今茲數公得請於帝有詔
令新保樂徙甘露所云葺葺許用正錢今則量抽掌
閑供飼國馬數內商權納其資課迴給工人計一歲
省庫錢七百貫有奇以約財裨國其利一也甲令曰

諸坊馬每年四月十一日停料野放今則以三月中
候陽崖墳盈春草先長使停橐穀俾逐川原計一歲
減菽粟四千石箕杆三萬圍俟來年之用以隨時預
蓄其利二也八坊營田一千二百三十餘頃析置十
屯密邇農家悅來租墾王在京邑則稅其生芻天旋
洛師乃藏厥嘉實歲中收貯二萬五千石新蒸倍之
以安甿盡地其利三也又緣馬所須羈絆翦刷黼鏤
畚筲油藥灌劑之物又甌滌除之器比年皆旁勞州

縣長度公錢誅求無時不給其用寢以承弊人多懼
憂今則權差夫丁率自采造成二萬六千五百三十
石升枚具歲中省百姓供費三千貫以柅煩激情其
利四也內廢馬每年有瘠者病者老者疲者擇其不
任者以頒諸坊則必餒之父之行之節之俟其跳梁
俟其充臍而後入之以內癰起廢其利五也是五者
有仁人焉有正政焉何獨師古始為成憲則知從分
公之教可以阜從李公之法可以經從三判官之幹

蠱可以事事無留從韋公之訾訾可以孜孜不怠古
者有勞於國則紀之有功於人亦紀之里克賦在垆
之頌燕公篆監收之作吾從二史臣之後安敢墜於
斯文其詞曰天生乘玉兮德山陵澤馬於阜兮屢惟
休至徵君命臣力兮庶績其凝八坊載就兮畢來斯
昇岐山之下兮田疇好涇水之將兮多媿草繚垣墉
兮積芻橐天馬來兮從東道羣紫鷺兮駢綠蛇骨象
奇兮歸帝家毛御風兮蹄踐雪舉籥雲兮低噴沙既

伯既禱兮無災害有馭有容兮真沛艾縞身朱鬣兮
又白顛晚影長鳴兮聲造天兮安匹兮龍為友吾君
馭兮壽千年

宋范仲淹寧州狄梁公廟記 天地閉孰將闢焉日月
蝕孰將廓焉大厦仆孰將起焉神器墜孰將舉焉巖
巖乎克當其任者惟梁公之偉歟公諱仁傑字懷英
太原人也祖宗高烈本傳在矣公為子極於孝為臣
極於忠忠孝之外揭如日月者敢歌於廟中公嘗赴

并州掾過太行山顧瞻河陽見白雲孤飛曰吾親在
其下久而不能去左右為之感動詩有陟岵陟屺傷
君子于役弗忘其親之深吁嗟乎孝之至也忠之所
由生乎公嘗以同府掾當使絕域其母老疾公謂之
曰奈何重太夫人萬里之憂詣長史府請代行時長
史司馬方毗睚不協感公之義歡如平生吁嗟乎與
人交而先其憂況君臣之際乎公為大理丞決諸道
滯獄萬七千人天下服其平武衛將軍權善才坐伐

昭陵栢高宗命戮之公抗奏不却上怒曰彼致我不
孝左右矚公令出公前曰陛下以一樹而殺一將軍
張釋之所謂假有盜長陵一抔土則將何法以加之
臣豈敢奉詔陷陛下於不道帝意解善才得恕死吁
嗟乎執法之官患在少恩公獨愛君以仁何所存之
遠乎高宗幸汾陽宮道出妬女祠下彼俗謂盛服過
者必有風雷之災并州發數萬人別開御道公為知
頓使曰天子之行風伯清塵雨師洒道彼何害哉遽

命罷其役又公為江南巡檢使奏毀淫祠千七百所
所存惟夏禹秦伯季子伍員四廟曰安使無功血食
以亂明哲之祠乎吁嗟乎神猶正之而況於人乎公
為寧州刺史能撫諸夏郡人紀之碑及遷豫州會越
王亂後緣坐七百人籍沒者五千口有使促行刑公
緩之密表以聞曰臣言似理逆人不言則傷陛下好
生之意既成復毀意不能定彼咸非本心惟陛下矜
焉有詔貸死流於豐州道過寧州之舊治父老迎而

勞之曰我狄使君活汝輩耶相攜哭於碑下齋三日而去吁嗟乎古謂民之父母如公則過焉斯人也死而生之豈父母之能乎時宰相張光輔率師平越卒之亂將士貪暴公拒之不應光輔怒曰州將忽元帥耶對曰公以三十萬衆除一亂臣彼脅從輩聞王師來棄城而降者萬計公縱暴兵殺降以為功使無辜之人肝腦塗地如得上方斬馬劍加於君頸雖死無恨光輔不能屈奏公不遜左遷復州刺史吁嗟乎孟

氏有言威武不能屈是為大丈夫其公之謂乎公為地官侍郎同鳳閣鸞臺平章事為來俊臣誣搆下獄公曰大周革命萬物維新唐室舊臣甘從誅戮因家人告變得免死貶彭澤令獄吏嘗抑公誣引楊執柔公曰天平吾何能為以首觸柱流血被面彼懼而謝焉吁嗟乎陷穽之中不義不為况廟堂之上乎契丹陷冀州起公為魏州刺史以禦焉時河朔震動咸驅民保鄆郭公至下令曰百姓復爾業寇來吾自當之

敵聞風而退魏人為之立碑未幾入相請罷戍疎勒等四鎮以肥中國又請罷安東以息江南之饋輸識者避之北兵再寇趙定間公出為河北道元帥敵退就命公為安撫大使前為敵人所脅從者咸逃散山谷公請曲赦河北諸州以安反側朝廷從之吁嗟乎四方之事知無不為豈虛尚清談而已乎公在相日中宗幽房陵則天欲立武三思為儲嗣一日問羣臣可否衆皆稱賀公退而不答則天曰無乃有異議乎

對曰有之昨陛下命三思募武士歲時之間得數百人及命廬陵王代之方數日之間應者十倍臣知人心未厭唐德則天怒令策出又一日則天謂公曰我夢雙陸不勝者何對曰雙陸不勝宮中無子也復命策出又一日則天有疾公入問閣中則天曰我夢鸚鵡雙翅折者何對曰武者陛下之姓相王廬陵王則陛下之羽翼也是可折乎時三思在側怒發赤色則天以公屢言不奪一旦感悟遣中使密詔廬陵王矯

衣而入人無知者乃召公坐於簾外而問曰我欲立
三思羣臣無不可者惟侯公一言從之則與卿長保
富貴不從則無復得與卿相見矣公從容對曰太子
天下之本本一搖而天下動陛下豈以一心之欲輕
天下之動哉太宗百戰取天下授之子孫三思何與
焉昔高宗寢疾令陛下權親軍國陛下奄有神器數
十年又將以三思為後如天下何且姑與母孰親子
與姪孰近立廬陵王則陛下萬歲後享唐之血食立

三思則宗廟無祔姑之禮臣不敢愛死以奉制陛下
其圖焉則天感泣塞簾使廬陵王拜公而謂曰今日
國老與汝天子公哭仆地則天命左右起之拊公背
曰豈朕之臣社稷之臣也已而奏曰還宮無儀孰為
太子復置廬陵王於龍門備禮以迎中外大悅吁嗟
乎定天下之業斷天下之疑其至誠如神雷霆之威
不得而變乎則天嘗命公擇人公曰欲何為曰可為
將相者公曰如求文章則今宰相李嶠蘇味道足矣

豈文士雖誤思得奇才以成天下之務乎曰此朕之
心也公曰荊州長史張柬之真宰相才誠老矣一朝
用之尚能竭其心乃召拜洛州司馬他日又問人於
公對曰臣前言張柬之雖遷洛州猶未用焉改秋官
侍郎及召為相果能誅張易之輩返正中宗復則天
為皇太后吁嗟乎薄艾華重才實其知人之深乎又
嘗引拔桓彥範敬暉姚元宗等至公卿者數十人公
之勲德不可殫論有議論數十萬言李邕載之別傳

論者謂松栢不夭金石不柔受於天焉公為大理丞
抗天子而不屈在豫州日拒元帥而不下及居相位
果能復廢主以正天下之本豈非剛正之氣出乎誠
性見於事業時優游縉紳之中顛而不扶危而不持
者亦何以哉仲淹謁公之祠而述焉且系之曰商有
三仁弗救其滅漢有四皓正於未奪嗚呼武暴如火
李寒如灰何心不隨何力可回我公哀傷拯天之亡
逆長風而孤騫遡大川以獨航金可草公不可草孰

為乎剛地可動公不可動孰為乎方一朝感通羣陰
披攘天子既臣而皇天下既周而唐七世發靈萬年
垂光噫非天下之至誠其孰能當

張載大順城碑 記曰兵久不用文脩武縱天警我

宋羗蠢而動恃地之彊謂兵之衆傲侮中原如撫而
弄天子曰嘻是不可捨養姦縱殘何以令下講謨於
朝講兵於野鑣刑斧誅選付能者皇皇范侯開府於
慶北方之師坐立以聽公曰彼羗地武兵勁我士未

練宜勿與競當避其彊徐以計勝吾視塞口有田其中賊騎未近卯橫午縱余欲連壁以禦其衝保兵儲糧以俟其窮將吏曹掾軍師走卒交口同辭樂贊公命月良日吉將奮其旅出卒於營出器於府出幣於帑出糧於庾公曰戒哉無敗我舉汝礪汝戈汝鑿汝斧汝干汝誅汝勤汝與既戒既嚴遂及城所索木箕土編繩奮杵敵騎之來百十其伍自朝及晨衆積我倍公曰無譁是亦何害彼姦我乘及我未備勢雖不

敵吾有以恃爰募強弩其衆累百依城而陣以堅以
格戒曰謹之無鬪以力去則勿追罷我以役賊之逼
城傷死無數莫大我加因潰而驚公曰可矣我功汝
全無怠無遽城之惟堅勞不累日池堦以完深以如
泉歸焉如山百萬雄師莫可以前公曰濟矣吾議其
旋擇士以守釋民而遷書勞賞才以斂以筵圖列而
上薦聞於天子曰嗟我嘉汝賢錫號大順因名其
川于金于湯保之萬年

陶穀王母宮碑記 祭法曰法施於人則祀之辨方
之為法制也不亦大哉神有所職足以垂訓者孰可
闕焉按爾雅觚竹北戶西王日下謂之四荒王母事
蹟其來久矣名載方策理非語恠西周受命之四世
有君曰穆王享國五十載乘八駿宴瑤池捧王母之
觴乃歌黃竹西漢受命之四世有君曰武帝享國亦
五十載期七夕會甘泉降王母之駕遂薦仙桃周穆
之觀西極也濯馬潼飲鵠血踐巨蒐之國乃升弇山

故汲冢有穆天子傳漢武之禱靈境也祀雍時幸朝
那立飛廉之館以望玄圃故樂章有上之回曲嗚呼
湘靈鼓瑟虞舜二妃也黃姑有星天河織女也或楚
詞所傳或巫咸所記猶能編祀典配嚴祠簫鼓豆籩
預四時之享犧牲玉帛陪百神之祭豈若王母為九
光聖媛統三清上真佩分景之玉劍納瑤瓊之鳳鳥
八琅仙璫以節樂九色班麟而在馭嘯詠則海神鼓
舞指顧則岳靈奔走輔五帝於金闕較三官於絳河

位冠上宮福流下土則回中有王母之廟非不經也
年祀寔遠棟宇墮壞壇歌杳朽蔽荆棘於荒庭井廢
禽亡噪烏鳶於古壘物不終否崇之在人太師清河
公受脤建牙三臨安定軍功政事紀在旂常是邦也
壓涇水之上游控西羗之右地土宜菽麥俗習騎射
撫之有道則風能偃草馭之非理則水亦覆舟中權
失政不可一日而處矧三鎮乎歲戊辰春二月公介
主人覲天子設庭燎以延之奏肆夏以寵之臨軒絕

席以綏懷大輅繁纓而錫命禮成三接詔還舊鎮公
既旋所理來謁靈廟齋莊有感肝蜜如答申命主者
鳩工繕脩難夢章於庭除封植嘉樹易顏簷於廊廡
締構宏材丹青盡飾於天安黼藻增嚴於羽帳雲生
畫棟如瞻西土之遙水閨長川若訝東溟之淺容衛
既肅精誠在茲何須玉女投壺望明星於太華瑤姬
感夢灑暮雨於陽臺合徵幼婦之辭庶盡上真之美
較也學非博古才不逮時論思謬冠於詞臣叙事敢

踰於實錄久直金鑾之殿視草無功強窺朱雀之窗
偷桃知愧頌曰崑崙之墟崦嵫之下戴勝蓬髮虎豹
為伍是耶非耶怪哉王母丹臺命駕七夕為期雲輶
鳳輦劍珮光輝倩兮盼兮穆若仙安宅元都兮如彼
降漢宮兮若是奚靈聖之多端駭變化之神異考山
經與竹書故兩留於前事山之巔兮水之渚莫玉卮
兮薦金徽白雲零落歸何處黃竹摧殘無一枝撫弇
山之舊石紀涇水之仙祠

元潘昂霄窮河源記

河源在吐蕃朶甘斯西鄙有泉

百餘泓或潦水沮洳渙散方可七八十里且泥弱不勝人跡近觀弗克傍立高山下視燦若列星以故名鄂端諾爾譯言星宿海也羣流奔湍近五七里匯二巨澤名鄂楞諾爾自西徂東連屬吞噬廣輪馬行一日程迤邐東驚成川號齊必勒河二三日程水西南來名伊爾齊合齊必勒三四日程水南來名呼蘭又水東南來名伊拉齊合流入齊必勒其流寢大始名黃河然

水清人可涉又一二日岐裂八九股名伊遜鄂羅木譯
言九渡通廣六七里馬亦可渡又四日程水渾濁
土人抱革囊乘馬過之民聚部落糾集木幹象舟傳
毛草以濟僅容兩人繼是兩山岐東廣可一里二里
或半里深莫測矣朶甘斯東北鄙有大雪山名伊拉
瑪博囉其山最高譯言騰格哩哈達即崑崙也山腹
至頂皆雪冬夏不消土人言遠年成冰六月見之自
八九股水至崑崙行二十六日程河行崑崙南半日

程既又四日程至地名庫濟及克特二地相屬又
三日地名哈喇伯勒齊爾四達之衝也多寇盜有官
兵鎮防崑崙迤西人簡少多處山南山皆不穹峻水
亦散漫獸有犛牛野馬狼狽羆羊之類其東山益高
地亦漸下岸狹隘有狐可一躍而越之處行五六日
程有水西南來名納琳哈刺譯言細黃河也又兩日
程水南來名奇爾穆蘇二水合流入河河北行轉西
至崑崙北二日程地水過之北流少東又北流入河

半月程至歸德州地名必齊勒始有州治官府州隸
河州置司吐蕃等處宣慰司所轄又四日程至積
石州即禹貢積石云

明徐蘭鎮遠橋記 維明既受命威德遠加道通西域
蘭州古屬金城郡距河為城河故有津控扼衝要洪
武四年宋國公奉命西征守禦指揮僉事趙祥去城
西一里許造浮橋以濟師師還遂撤弗用又四年魏
國公帥師定地置西涼西寧莊浪諸衛仍去城西約

十里造橋以通往來給饋餉因而弗草名曰鎮遠然
河流悍急堤壩弗固咸謂非久遠計又十年蘭州衛
指揮相城西北河水少緩擬改置橋近且易守詢諸
父老以為古之金城關在焉謀諸同僚僉以為允某
月某日圖上形勢陝西都指揮使轉聞制若曰可爰
於六月內鳩工明年春二月永解齋祓率僚屬虔祀
於神協心齊力某日橋成士民咸請文以紀成績按
漢史趙充國初擊西羌遣三校啣枚夜渡即營陣以

防衝突時則橋未造也逮上方畧其一以為治道橋以制西域信威千里從枕席上過師是橋之利涉自古而然今祇承上命屏翰藩維乃能以古良將自期躬督吏士決意改作造舟二十有八常用二十有五河漲則用其餘以廣之每舟相去一丈五尺上流定以石龍如舟上加板欄楯兩旁以衛行者橋南北岸各樹鐵柱一木柱六繫鐵鎖大繩貫橋令相屬隨波升降帖若坦途橋之南去城八十步新築小城延袤

數丈中置門以詰行旅城上建樓東偏荆公廨凡若
千橋門西偏荆祠宇以奉河神橋之北因山為城延
袤百餘丈東西置門悉建樓其上又初壽亭侯祠制
度一一各適其宜嗟夫大河沄沄天險莫逾舟梁橫
亘徑接康衢棟宇壘飛照耀丹碧雉堞環繚隱約蔽
虧誠邊徼要津千古之偉觀也諸葛武侯有曰治世
以大德不以小惠若斯橋者其可謂上昭聖天子威
德下以康濟斯人者乎夫善作者必藉夫善繼善始

者必賴夫善終若是橋也諮謀之詳審規度之宏深
財用之完美將事之勤恪作始之善謀蔑以加矣歲
月滋久風水撼頓葺理敝漏必賴後人承繼之重敢
因士民之請為之紀其始末俾鐫於石以垂不朽庶
嗣事者之有所徵焉

黃諫蘭州衛哨馬營記 正統十二年四月初六日

丁酉都閫李公奉命築哨馬營堡於河北大岔口越
十有四日工完二十又二日癸丑大合衛縣之官屬

將校熊羆之士及邑人之老稚以落之軍民和會聞
郭溢郭既卒事其邑之官僚士庶咸以此為禦邊之
重務不可不紀其歲月乃致書於予請為之記予邑
人也既受命不敢辭其詞曰粵維皋蘭乃古金城郡
西控大河素稱雄鎮大河之北有山嶸嶸環衛列峙
下瞰廣川既平且曠通乎絕塞不毛之地介乎西境
大夏之墟迢遞綿邈來通斯邑寇賊往來必經乎是
然其形勢險隘允為阨塞聖天子在位之十年以是

為重鎮命公守此單車來臨遂相其土地用是規畫
逮次年之冬請於朝今年春申命陝西藩臬之司乃
往偕公相其地宜集工庀材經之營之人皆樂趨不
日而就崇墉接漢高壘連雲邊備以固邑居以寧控
扼險要束制咽喉斯為重事大莫是舉天子之武惟
公是布天子之文惟公是宣山勢巍巍河流渾渾天
子萬年邦國永安乃伐山石刻之日月尚俾來者知
作之所始

婁謙平涼利民渠記 陝之平涼郡治東抵涇州有
平衍壤地廣袤數百里而涇河之水實經流其間引
以津灌則土田膏液年穀可擬豐登尚何燠旱之足
恤乎特圖志所載故無渠埭而居人習以成俗舉目
前湏闕之水則信其奔流置為棄物凡有播種歲率
仰給於天天雨及時則坐享有年一遇魃虐流行則
計無所施不但距河入深之地不霑其利雖夾河兩
岸之間亦不蒙餘波之潤局處告災之外惟束手待

斃而已歷千百載間竟無興念於此而倡之者成化
甲辰歲夏秋不雨屬歲大祲侍御史中丞南舒鄭公
時實受簡命重託鎮撫關中嘗符移六道周諏民隱
興堰減以佐耕至冬會圯焚有警告變日急上命版
曹亞卿媯川李公衍昇以節鉞之寄越今年乙巳春
推轂入境內即檄顧守臣疏決河渠以勸農事其弭
災興利之心蓋與中丞公不謀而自同也僉憲陽城
李君經分道關西首以所部平涼之地論列請命二

公曰急圖之勿後也憲使延平羅君明時與聞之亦力贊興事維時李君績食平涼敦琢官屬荒度土功適郡之豪右強梁齟齬百出君則不暇顧恤毅然調役屬工始自府治城北淪暖泉以灌蔬圃而官民賴之繼分引涇水五里鋪至東二十里鋪為一渠楊家磨抵四十里鋪為四渠袁家莊至七十里鋪為二渠迤東至九十里鋪北引涇水一渠南引金龍池白水驛河二渠合流花家庄東行三十里逾平涼境連亘

開一大渠又流四十里抵涇州城西會汭入涇官路
之南渠不可通乃疏百泉王村等溝析為七渠涇河
之北河岸漸高又疏金池瓦窰等溝析為六渠州城
西引汭水幫城北析東山下陰注附郭田園獨令成
渠汭迤西至崇信縣界散引河子楮家等溝別為一
十一溝州城之東地高河下難於築堰隸南山者引
木家溝至范家溝作一十五渠隸北山者引路家溝
至白水溝作為一十一渠合而計之以渠則六十有

二以道里幾二百里許以溉田則三千頃有奇也渠之制深十五六尺淺者亦居其五之四廣六七尺窄者亦居其三之二長短大率不齊惟視水力所至故不限於丈尺也渠當路衝則就渠身循土剋通為梁以便行旅又捷石刊木架水槽以接不通壘堰壩以固河防始事於是歲三月之朔民歡趨之百日而告成部吏工匠皆無所預惟拱手以受李君成算而已未幾亞卿公按節平涼因命之曰利民渠於是渠水

衍溢土脈漸漬來牟獲收成之望秋田遂長養之天
其功甚大而費則省使非亞卿中丞發端開示於前
憲使君憇憑於成則李君規撫綜理之密亦將遏佚
而弗章矣又况穹壤間利民盛事秘久不發必有神
物以撫護之者失此機會抑不知當幾何出以建萬
年無窮之澤也有司礪石請記其事予惟此渠之功
州郡利戶與凡往來目擊之人固已頌而歌之宜不
待記而顯且二公當此兵燹之日分閫鎮靜決策如

流非獨烽堠烟消邊徼安堵而八郡垂亡所賴以全
活者動以萬衆水利之興又特其一事也姑以志其
本末以告後之長民者使知成之不易如此相與維
持而增葺之是固二公之心抑亦羅君李君之志也
遂書為記

王華甘肅行太僕寺記 甘肅古河西諸郡地交戎
虜之區距京師數千里至明洪武二十四年始置行
都司於此以隸甘肅諸衛所三十年復建行太僕寺

設官以綜理馬政而諸衛所亦隸焉然官之名位視
京秩雖同而力勢反出連帥郡守下故士之勇於功
名者率不樂居是職至或以老疾棄去由是視解宇
如逆旅之視邸舍不特人無固志政亦因之以弛人
與政而交病其求非一日矣孰肯以補敝興廢為已
任哉弘治八年皇上明見萬里知馬政之弛由於官
之不舉其職特詔所司慎選材賢以居而廷章田美
遂以治襄陽乾州有聲獲與簡擢適都憲周公按節

於茲宣上德以柔遠人嚴憲度以貞百辟脩戎政靖
夷魯以安固疆圉撫治之暇詢視寺署見其棟宇摧
壓垣墉頽圯心甚病之遂慨然以脩建為己任廼會
計公私羨利貿羣材召衆工易朽敝以堅良治殘毀
為完固其中為前堂五間後亦如之其左為主簿廳
三間右亦如之為廊房翼於東西者各五間為重門
蔽於其前者各三間并脩葺解舍之可依棲者總計
其成共五十餘間外內周匝公私輯寧由是官有常

宇更有定居不特數十年之廢墜至是聿興而昔之
弛政亦因之畢舉人與政而文理固都憲公經營謀
度之功而董功役按度程以迄於成田美則尤有勞
焉公昔旬宣於浙於汴汴浙人至於今思之不置顧
予亦浙人而廷章昔為御史與予比鄰相知復稔義
不容虛其請遂為記之

楊一清巡撫陝西都察院題名碑 今天下藩省重
地朝廷勅遣內臺重臣以臨蒞之謂之巡撫巡撫之

職凡有司政務若錢穀士馬若刑名若賦役農桑水利之類悉聽剴裁文臣自方伯監司武臣自連帥偏裨而下咸奉法令遵受約束事有益於兵民得承制以便宜從事不拘文法焉可謂重矣陝西古稱秦中天府四塞之國內領八郡綿亘數千里北接沙漠西控羗戎為四方根本樞要之地若延綏寧夏甘肅三鎮雖俱宿重兵各有內外重臣仗節握符開府其地然饋餉供億率仰給內郡至於屯戍之兵統領之將

多自陝西調遣三鎮不得專焉是其為任又非他省
巡撫比矣凡巡撫關人吏部請於上於廷臣及方嶽
中舉才行素著者二人以聞而親簡其一用之比歲
陝西巡撫關人則又多自他省巡撫有勲績負時望
者改命而來蓋難之也弘治戊午都察院右副都御
史汝南熊公自巡撫山東移鎮於茲顧瞻行臺宏麗
靚深稽閱庶務察凡所以安內全外者規畫井井纖
細備具嘆曰前任經理之功大矣求其名位世次之

詳不可悉得爰命有司稽之籍牒詢之父老耄貞石
將刻之乃進提學副使楊一清而屬之以文惟廳事
有石題名有記非古也而後世行之於政治不為無
助列賢不肖有勸戒之義焉識寬猛弛張繁簡先後
得損益之宜焉邦人之去思士林之仰止率於是乎
在而豈徒哉按陝西巡撫宣德間吉水羅公汝敬以
工部侍郎始受茲任自羅公而下所及知者凡二十
一人或以惠愛聞或以風力顯或以討叛樹勲烈或

以脩築城塹疏通水利著勞效進位尚書者已十二人位兼保傅者五人為冢宰者一人為大司馬者三人而今在朝者方來所進固未涯也其無聞於世者纔一二人爾嗚呼可謂盛哉夫惟天下之重地當用天下之正人夫惟天下之正人斯受天下之重任之數公者咸以正人被簡擢臨重地其卒當天下之重任而有餘力也宜矣繼自今巡撫於茲者宜何如紹承之哉國家設郡縣以統民設衛所以統兵慮其不

職也而領之以三司復慮三司之不職也而糾之以巡按又以巡按歲代不常且官有常職未免為文法所制勢有所格柄有所不專於是乎有巡撫都御史之設焉今之民與兵皆創傷困憊之餘愁苦之狀有不忍言者郡縣不能為之所望之三司三司不能為之所望之巡按又望之巡撫至巡撫則止矣巡撫不能為之所民將復誰望哉故為巡撫者知為朝廷愛養兵民而已政有為民病者我得而墮之事有為民

利者我得而興之諸司百執事有剝民財窮民力殘
民肌體以行若私者我得而除之宿奸鉅盜憑藉以
逞為民太蠹者我得而發之坐一堂之上有兵有刑
有挺有刃有斧鉞有華袞有陽春有霜雪其未來也
以無心待之其已來也以至公將之不說不隨不矯
不亢不撓不奪為之在我者盡吾心焉而毀譽榮辱
成敗利鈍皆有所不計嗚呼為巡撫者不當如是耶
抑此皆數公所常行而已效焉者余將致忠告於後

來意無出此故承熊公命於題名之石極言之公名
珣字騰霄舉己丑進士起縣令為御史歷山西按察
使進擢都憲好善惡惡出於天性刮奸剔蠹風采凜
然義所當為不遺餘力其樹立卓卓他自有述之者
茲不及致詳云

王寧窮汭記 汭水紀於禹貢廣韻汭音儒說文汭
從水從內訓曰兩水合流之謂也又曰小水入大水
之名質其實雍豫二州有專名之者有通名之者專

名者以義也通名者以類也以類通名如會於渭汭
東過洛汭是也蓋渭自鳥鼠而東逝涇出筭頭而北
來二水至高陵而匯於河經龍門東注豫州洛由熊
耳東北入河既皆小水入大水且兩流合為一以故
不曰涇渭而曰渭汭不曰河洛而曰洛汭由是推之
則凡諸州之水類於是者皆不拘於定名而得通稱
為汭也以義專名者涇屬渭汭是也汭在華亭城東
三里乃兩水合流而其北源西出小隴山之馬峽俗

呼北河南源西出隴山之仙姑峪俗呼南河北河環
朝那山前蓋山有古朝那王廟其西北有湫東去縣
東三里而別稱為雨山南源環王母山山巔有古王
母宮東去四里別稱為儀山俗呼為回頭山儀州實
以是名也儀雨兩山南北對峙豁開如門故兩水合
而東流名之曰汭也又二水交流而下亦專名為汭
也汭匯為深潭潭名合水水之北岸一臺高廣平夷
荆榛瓦礫錯雜相傳為禹王廟也北陟兩山之巔遙

見東南隱隱峯巒侵入太虛隴州吳山也沿汭峽石
三十里皆斷崖摧壁神禹疏鑿之跡也峽行十五里
南堧有女神之廟扁曰坻汭元君土人呼底茹娘娘
汭讀為茹茹孺同音廟東十五里至石堡汭北受柴
邱水源出朝那湫山之陽而陰即為涇水又東五里
至安口峴牛心山南受武村水汭至是益大北有斷
萬山自馬舖嶺柴邱而來南有五馬山自石櫃寺武
村而至兩壁削立巉崕百仞東汭於中雪浪湍激經

行五里為止城唐李元諒屯兵扼吐蕃者也屯東為崇信川油水益大深不可涉湍不可亂行旅皆袒而濟又東三十里北過崇信縣城崇信人曰汭水遠北又東七十里東過涇州過回山乃屬於涇弘治戊午督學憲副虎谷王公按涇州試諸生竣乃涉水登王母宮寧從行王公東眺曰北流而濁者何水平寧對曰涇也南流而清者何水平寧對曰汭也公曰是禹貢雍州屬涇之汭乎周職方其川涇汭乎昔公劉有

汭鞠之即吾過幽西行三十里涉一大河北入涇是
何名乎寧曰靈臺之達溪也公曰朱子註汭鞠之即
曰幽地日廣也試且廣求之斯地有百泉乎寧曰去
華亭西北三十五里山朝那湫陰有泉百餘為涇源
乃百泉也有溥原乎寧曰亭口靈臺之西汧陽隴州
之北華亭龍門之東有廣原唐尉遲敬德破突厥郭
子儀破吐蕃之西原也李元諒開美田千頃號曰良
原今為溥潤原公又曰此與吳山南北乎寧曰正相

南北公曰必茲西去百里外有兩水合流者始可謂之汭矣若其窮之乎寧計華亭至涇程一百三十五里果符公言還白之公曰朱子註詩言汭水出吳山西北者以名山而志名水窮源汭流也今遂謂出隴州東入於涇今隴水乃汧入渭去涇遠矣且將置溲原於何地乎

管律鐵柱泉記 去花馬池之西南興武營之東南小鹽池之東北均九十里交會之處有水甘冽是為

鐵柱泉日飲數萬騎弗涸左右數百里又皆沃壤可
耕之地北虜入寇往返必飲於茲而散掠靈夏長驅
平鞏實自茲始以其嬰是患也委沃壤為曠土者百
七十年矣嘉靖十五年丙申都察院左都御史兼兵
部左侍郎松石劉公奉天子命制三邊軍務乃躬涉
諸邊意在悉關隘之夷險城砦之虛實兵馬之強弱
道路之緩急而畫禦戎之策以授諸將是故霜行藿
食弗避厥勞至鐵柱泉駐蹕移時喟然諭諸將曰禦

戎其在茲矣可城之使虜絕飲固不戰自憊何前哲弗於是是圖哉維時巡撫寧夏右副都御史字川張公謀與公協乃力襄之即年秋七月內申按察僉事譚大夫閻度垣墉量高厚計丈尺鎮守總兵官都督王効率師徒具楨幹從畚鍤人樂趨事競効乃力越八月丁酉城成環四里許高四尋有奇而厚如之城以衛泉隍以衛城工圖永堅百七十年要害必爭之地一旦成巨防矣置兵千五兼募土人守之設官操

馭皆檢其才且能者慮風雨不蔽之患則給屋以居
之因地之利而利則給田以耕之草萊闢禾黍茂孳
畜蕃稊於百七十年者一旦大有資矣其廨宇倉場
無一不備宏綱細節無一不舉又肇來者無窮之益
是皆出於公之卓識特見而能乎人所未能今年丁
酉去茲泉南百里許亘東西為牆塹于所謂梁家泉
者亦城之重關疊險禦暴之計益密矣借虜騁騎亡
忌入境騎不得飲進則為新邊所扼退則為大邊所

邀天授之矣用是以息中原之擾休番戍之兵寬饋
餉之役功在社稷與黃河賀蘭實相悠久公之功謂
有紀極哉松石名天和湖南麻城人字川名文魁中
州蘭陽人俱正德戊辰進士譚閻西蜀蓬溪人正德
辛未進士王効陝西榆林人正德丁丑武舉法得備
書

胡纘宗卦臺記 成紀之北約三十里曰三陽川其
西北隅有臺焉義皇畫卦處也夫成紀故地名也漢

為郡唐為州宋為軍國朝亦為州然自晉至南北朝
與雍州並稱焉隴坻亘於東朱圉雄於西嵒冢屏於
前空峒望於後漢起於南渭衍於北乃生羲聖而三
陽則渭河納隴河處也今為三陽里三陽云者朝陽
啓明其臺光瑩太陽中天其臺宣朗夕陽返照其臺
騰射卦山儼於南長山負於北龍馬山集於西尉遲
峽約於東承渭於上流而資沃納隴於下流而納污
故是臺也前揖卦山卦山若屏若拱後俯龍馬山龍

馬山若圍若倚渭水環乎其北周道脩乎其南而卦
山自西傾南蜿蜒隨引漳而來未至三陽之東南而
止於其止也突出一小山其出如維其止如竚自上
視之如綴珠自下視之如充纊高可若干丈廣可若
千畝其臺層起俯視之如臺之出其周壁立仰視之
如臺之升故今謂之卦臺龍馬山自西傾北迤邐約
渭截隴而來至三陽之西北而止於其既止也循渭
之濱若啓軒開襟納臺然者而臺與龍馬山若相連

而實不相連也蓋界以渭矣渭水自隴西首陽縣鳥
鼠山東流經襄武獬道冀三縣乃受荆泉諸水出岑
峽逕新陽川自西循北逕東沿洄臺下其谿才容其
流而兩岸皆濱山其水若為臺環抱然者前有新陽
下城下瞰新陽川後有番城下瞰三陽川故登臺而
望之視卦山若却若顧視龍馬山若抱若倚視渭水
若環若帶視新陽川若吞若吐視三陽川若沉若浮
視隴水若引視長山若附故二山一水之間其臺若

坐若盤而羲皇觀天察地於此畫卦於此也豈天設此以啓其神哉抑地因此以兆其靈哉夫豈偶然哉嗟夫岷江之源也嶓冢漢之源也烏鼠渭之源也河出於崑崙揚於積石也洮出於西傾也隴出於隴首也則西北水流皆自隴而之東南支委繁衍不有淵源耶是羲聖之所以毓而卦爻之所以畫也郡人相傳臺有羲皇遺畫著雪即融今候之無驗蓋居人見諸田畦界址橫直層列卦山之麓有類於畫雪將融

而形益彰遂指以為先聖靈跡不知羲皇天生大聖也務駭人視聽而遺是跡示人以黎丘之幻耶抑豈居人仰瞻聖皇不欲見其遺臺荆棘而互為相傳耶趙錦陝西行都指揮使司記 仰惟我高皇帝混一

區宇稽古建官分理四海內而諸藩外而諸邊各設都指揮使司以統領衛所禦侮防奸之任雖均而輯戎固圉之責尤重也惟茲甘肅古雍州河西之域據三秦之上流控全陝之阨塞因以陝西行都指揮使

司建焉嘉靖甲辰春平陽李子忠奉命來視司篆於
凡政之弊者釐之利者與之暮月之間煥然振舉暇
與同僚寧夏黃子綺西安夏子繼武言及名宦因喟
然曰先達仕茲者多矣善不善皆吾輩師也何姓氏
之不載而漫無所稽耶於是礲石以題名記請予惟
西北之邊有九全陝實當其三而甘肅又為關隴重
地東有金城之固西有玉關之嚴南有祁連之屏翰
北有合黎之拱護轄甘涼山永肅鎮西寧莊浪十五

衛所之官軍撫齊動蒙古罕都哈密安定察遜苦峪
諸部落之番族近而藩垣四鎮遠而綱領九邊通玉
帛於天方列氈廬於疆場黃河黑水青海流沙崑崙
崆峒際天極地巍然一大鎮也國初以都督重臣臨
之畀以干城之責付以分間之隆政令惟其弛張甲
兵歸其掌握又降以璽書給以關防凡機密重情許
其徑達至於各衛經歷蔡秉彝張納等亦蒙頒勅賜
以禦寒裘服特示優異聖祖明見萬里之外肇建永

世宏基淵乎微矣是以上之晉錫駢蕃下之忠義感奮西夷職貢重譯來庭屬番歸心軍民樂業過化存神之功效真足以比隆唐虞三代猗歟盛哉爰自成化年來土魯番酋敢肆悖逆仇襲哈密回忠順以西遷侵逼瓜沙逐羗戎而內徙聲教雖及乎昧谷藩籬實徹乎燉煌且西海為海寇竊據南山皆番回環居套賊出沒於河湟衛特睥睨乎嘉峪千古之金湯始多事矣嗚呼璽書責任之專關防奏疏之密不亦廢

閤也哉雖然文武之道待人後行要亦在乎轉移間
爾誠能憂時憤敵殫力畢心撫黔黎練士卒足兵食
之計脩安攘之規以大義結番夷以至誠安反側酌
古而宜於今撥亂而反之正則大禹之西戎即叙成
周之底貢旅獒將復見於今日矣我聖天子中興之
盛豈不與商高周宣同光萬世也哉若夫虛文塞責
徒事紛紜尸位素餐罔知展布祇見日流於敝公議
安能違耶予承乏撫循用是深懼所賴同志二三子

以匡厥不逮因述其張本以告夫將來之勒名於茲
者抑愚又有說焉昔子行役各邊形勢險隘頗得其
詳嘗謂京師猶人之腹心也宣大項背也晉薊東遼
肘腋也延寧肢體也甘肅踵足也邇者西北諸邊率
為賊藪若殘元遺孽住牧於宣府之窩穴諸達賊酋
屯集於大同之青山濟農羣醜盤據於延寧之河套
深根固蒂黨惡肆兇近又假以收捕海寇迫脅諸番
外交內攻奸謀巨測正吾人卧薪嘗膽之日也苟或

少有意忽則榮衛滯虛腠理疎弱元氣漸耗矣能免
腹心之無恙乎是知甘肅一鎮寓乎全陝之動靜全
陝動靜繫夫雲晉之安危雲晉安危關乎天下之治
亂廟堂之上必有能建萬世治安之長策者而區區
遠臣寧忍已於言哉因併以為記

李夢陽華池雜記 華池古樂蟠縣也故城川華池
東天子溝夫人洞並故城川蒙恬斬山堙谷處也今
馳道存焉稍東則陽周城也牡丹園華池城東北太

和觀牡丹園西張將軍墓華池城北邊路將軍名吉
宋范仲淹卒也以節死贈將軍詳見郡志興陽洞華
池西崖也不窰陵慶陽東山傅介子墓西山范仲淹
宅今為府庫范純仁遺棟今為府儀門過木鵝池慶
陽城鑿通河處臨川閣鵝池上宋蔣之奇建今廢威
武樓慶陽北城樓也宋建公劉廟在慶陽其兩壁畫
周三十七王云李子曰余如華池在弘治乙卯年馬
居益三年云從予游者尉氏左國璣慶陽高尚志暨

其弟尚德華池王祐

馬理忠節祠碑記

嘉靖間中丞趙公節鎮河西下

教諸道俾脩舉祠事教至西寧兵備憲副李侯報曰
茲湟中自漢迄今多柔遠殿邦及委身報國人副使
欲祠之未敢公曰茲國典匪僭盍舉諸憲副得報乃
經營因闢地一區為垣門二堂廡碑亭維備乃擬應
祀賢報公曰某祠於張掖某地某法不應祀他所擬
漢後將軍壯侯諱充國趙公彊弩將軍樂成侯諱延

壽許公伏波將軍忠成侯諱援馬公平壽敬侯諱訓
鄧公隋衛尉諱權劉公唐平章事幽州都督諱師德
婁公宋秦鳳經畧使諱韶王公河州團練諱永年高
公隴右節度使諱厚王公明長興侯諱秉文耿公世
襲土官指揮諱南哥李公會寧伯諱英李公合序列
正祠指揮使陳治千戶李淳百戶佛元葛果丁顯合
序列兩廡祠依文廟式為木主四位一席春秋致祭
憲副得報遂以時裡祀如公言光祿寺卿馬理聞而

善之曰湟中自漢武使去病開疆至壯侯討叛用王
師屯田其間前後降羌至三萬一千二百餘人卒全
勝以還及老朝廷有四夷大議常與咨謀比卒後思
其功德不置圖形未央至成帝時尤感事追美召黃
門揚雄即圖頌焉伏波建議不棄湟中以除羌害討
叛至矢貫其脰桓桓自若卒恩威遠孚諸羌咸附又
為奏置長吏開導水田勸以耕牧敬侯用恩信結羌
得其死力破殲迷唐使諸羌歸服威信大行羌俗親

死歌呼不哭比侯歿羌臨者日數千人至欲捐生以
殉遂家立侯祠恒禱祀焉是皆功德著於中外垂於
後世真社稷禩人臣表模何可訾也樂成下獨婁
公長者無忝先烈足為後矩其次長興諸賢亦開疆
展土仗節死義宜報祀者然遺棄弗祀久矣不有君
子何以勸忠於戲茲舉中丞公之教也憲副之力也
有裨風教多矣

王家屏中路寧河臺記

河從崑崙積石歷河州注

於峽口流經寧夏東南直北穿障下其於寧夏猶襟帶之固也顧自東勝既棄敵入據套中時時猖獗侵我瀕河諸砦疆事滋棘矣會大中丞羅公以文武雋望被上簡命鎮撫寧夏至之日率諸將暨憲大夫按行塞西望賀蘭北眺高關東瞰洪流南游目於環慶之野還至渡口見津人操舟渡焉渡者蟻集河孺而無亭以守之則顧謂諸將曰嗟乎天設之險以扞蔽區夏而棄與敵共之又弛要害不為備奈何欲卻敵

使毋數侵也吾茲揣敵所嚮一旦有變不踰河而西
繞賀蘭之北以臨廣武則有乘長城遡流而南下以
窺橫城之津耳然踰河之敵有河山以闌之有列屯
以間之我知而為備猶距之外戶也敵即南下地無
河山之闌列屯之間颺馳而狎至賊反居內我顧居
外急在堂奧間矣計宜益築長城塞用遮敵使不南
下而建亭堠於河之東涯以設橫城之津此要害之
守也諸將敬諾乃約日發卒築長城塞橫亘凡五百

餘里別徵卒築臺河上臺高五丈五尺周環四倍之
上構亭三楹廂房四椽前施迤橋數級上嶸嶸翼翼
如也外列雉為城城周環九十餘丈高二丈四尺繚
以重門設津吏及堠卒守焉是役也卒皆見兵材皆
夙具不五旬而告成事衆且以為烽堠且以為津亭
登眺其上而山巖隴坂委蛇曲折歷歷在目偉哉誠
朔方一壯觀矣憲大夫解君馳狀徵記王子王子曰
昔南仲城朔方而獵狁襄重在守也趙阻漳淦之固

用能抗秦漢據白馬之津終以蹙項則守要之謂矣
今瀕河亭堠牙錯棋布守非不堅顧徒知守疆而不
知守要地不固即列堠數萬舉烽蔽天安所用之
寧夏雖邊鎮而京朝之使藩集之長列郡之吏下逮
行商游士工技徒隸之人往來境上者絙相屬也有
如津吏不戒猝值道路之警曾不得聚廬而託處安
能問諸水濱豈惟客使是虞橫城之津厄則靈州之
道梗靈州之道梗則內郡之輸輓不得方軌而北上

而寧夏急矣此公所計為要害者也人見是臺之成
居者倚以為望行者恃以為歸乃指以為烽堠以為
津亭嗚呼公之意豈直為烽堠津亭計哉公甃堠鎮
城石甃開壩築控夷堡脩勝金關建庾興學疆理之
功不可殫述述其防河者如此後之登斯臺者尚有
味乎余言

姜圖南雙忠祠記 雙忠者何祀明大中丞鄒公應
龍廬江太守張公萬紀也金城人物自武賢慶忌李

歲渾瑊而下衆矣何為乎於二公祀之曰以諫曰諫
何為乎以今祀之先此矣不有太康王公請祭葬復
爵秩額忠諫乎既祀矣曷為乎合之曰二公地同時
同建言同也同則從同曷為祀於書院曰以講學明
道也講學明道曷為乎不廡曰以忠也嗚呼憶明世
宗時代來入繼大禮議起杖竄殆數百人以為人才
用之不勝用矣不數十年士氣頽落奸邪雜出以濁
亂朝政而時之在位者奄奄如抱葉蟬無復敢有出

聲者唯二公抗疏直陳一杖一戍而所為奸邪亦稍
稍削去由今思之明之世宗得稱為中興神穆得延
為至治皆二公一擊之力也張公之救楊忠愍也曰
如以臣為黨護將臣處死萬不足惜鄒公之糾分宜
也曰如臣言不實願斬臣頭懸之藁竿以謝世蕃父
子當乎此時豈意得全首領為完人哉即貿首樞胸
血藏化碧不易於此矣撫軍六詔出守廬江猶是天
王聖明不忍以未死之身苟且耳鳴呼凡為國家平

居無事九賓庭燎萬里風行以為所欲為百世無憂也既勢屈形盡顛覆一朝朱全忠欲以牙將為太常卿裴樞執不可全忠殺之天子不能救而唐因以亡嗚呼使言路得如裴樞者數十人相與消弭逆折必不至於亡即亡矣亦不至於如此之速也賢者不位而位者不賢急者不諫而諫者不急此萬世之所以嘆息痛恨於昭宣也二公之忠猶鈎黨也其為李杜猶睢陽也其為張許漢世之所以亂而不亡者數十

年唐世之所以得安驅至蜀皆此物此志也蘋藻之
祀出於觀風河湟之靈式於英絕直養無害成杖西
市與談道天年總是一致故即以雙忠祠次忠愍之
右嗚呼凡為國家必當思所以開通言路而言路亦
必思所以為於可為之時吾蓋因雙忠而有所感矣
劉敏寬北山鐵厰碑 往者主和議邊備久弛塞上
數苦兵輸率敝於道田公鎮撫五郡峙儲簡銳主客
騎步各程其材鹽筴屯田靡廢不舉介冑鋒鏑礮石

神器戰守之具也而悉資坑冶故事陝西行省歲供
甘州軍需熟鐵十萬九百餘斤鳳翔歲供西寧熟鐵
七千五百餘斤乏則復齎行李鬻之闕以東稽程則
數千里而遙稽時則以月以歲徒糜費罷徵發轉輸
已耳且無能濟緩急公乃策諸監司徧搜山澤復徵
冶氏於秦晉得冶氏來襄其事余不佞備兵湟中始
得礦下馬圈北山之麓既得之大山硤冶氏謂北山
礦廣而堅視大硤良使其山峭崿澗中石齟齬積無

算踰數里山木蕃殖薪樵者報曰可以冶鐵余躬詣相度乃即北山下置官廳六楹鐵爐二座營舍五十間跨山為墩上建墩柵四楹周圍牆塹足備不測合簡西寧各營步卒四百供版築之役擇指揮盧忠爰督厥成仍選士習其藝復令如周官所載物其地圖而授之煨者採者各責其人為長久計是役也有五利焉河西四面用武之國朝治而夕效取之源源一利也無輸運數千里之勞民獲休息二利也隨取隨

給無歲月之淹三利也工役則取諸坐食之步卒炭石則採諸無禁之山林下不擾閭閻上不煩公帑四利也以五郡之材資五郡之用旁郡額供止輸折價以備除器之需五利也況邇者彼數內興數為我兵所衄為之咋舌稱鐵壁云今復聞存在在坑冶寧復有不逞志堅甲利刃烈火迅機行且凌崑崙沸青海建萬世無窮之利公可謂忠於國矣昔管子以策試齊遂表東海管子策士耳且富强之說不足述也顧齊

以管子霸乃今用事豈少管子哉即局促因循而以
網紀經畫為迂且擾奈國事何誠能度不費之利興
不怨之勞事半而倍於古人務久遠以裕國計當保
世世無疆場憂余惟前事者後事師也因伐北山之
石而紀之若此公名樂戊辰進士任立人

張九德靈州河堤記 靈州阻河而城其西南當河
流之衝復趨而北可十里每夏秋湍激受害不啻剝
膚雖秦漢二渠溉田至數千頃而利與害錯其侵城

實甚粵稽洪武甲子迄今城凡三徙皆以河故而河亦益徙而東自不佞來受事不一載去城僅數十武矣先是禦河歲役夫三千束薪十萬亡慮數百千金率委諸壑人情洶洶議徙民徙城以為長策不佞則謂禦河猶禦敵也敵闌入不偏之去更延之入乎且勢若建瓴而僅僅積薪委土與陽侯爭此助之決耳計非巨石砥柱之不可獨慮費且不訾計無出不佞即捐月俸二百金為役者先而謀之薦紳邑令戴君

任及諸生輩議堤以石無所事薪改徵河西年例柴
價五百金軍民願輸地基銀八十兩暨諸捐助驗庫
藏之羨合之得千四百有奇費用集矣則議民間量
地畝出夫量田里出車調兩河營卒更番受役工力
備矣乃造船百艘運硤口石往來不絕材具庀矣遂
請於先撫寧夏今制臺少司馬介石李公前制臺今
大司徒瞻予李公俱報可則以守備張大綬董隄務
指揮孟養浩司出納經歷李盛春程工作大興石隄

之後而議者紛若謂濱河皆流沙不任受石恐卒無
成功適旋築旋潰衆口愈囂予堅持之曰此根虛易
傾耳水豈能負石而趨耶益令聚石投之一日盡八
百艘三日基始定於是從南隅實地始累石為隄首
四十餘丈用遏水衝繼以次迤西而北其累石亦如
之計隄長六千餘丈功甫成而河西徙復由故道視
先所受嚙地淤為灘可耕可藝去城已十數里矣是
後也經始於天啓癸亥之正月告成於天啓乙丑之

四月凡費時二年有半費金九百一十兩有奇費米
麥六十石而貯尚有餘羨念往歲議隄請帑金萬二
千業奉旨下部覆不果今議約三千金猶慮不足至
厘少司馬公捐俸金百兩而同守盧君自立參戎高
君師孟等亦釀助有差然卒以有餘羨故蘭還是皆
百執事殫心經畫靡有虛糜之成效也憶不佞初抵
靈行河籌之再三始而秦渠隄隤水暴洩不能灌溉
為築長隄濬之歲比稔而漢伯渠又苦無尾閘腴田

皆成巨浸因以治隄之餘為開蘆洞長十三丈五尺
高廣各三大五尺自秦渠北岸抵窪橋疏渠道三十
里瀉水入河復故田數百頃增稅額數千石凡費金
五十六兩有奇而椿鍊諸費不與焉古有言河者天
下之大利大害也故周禮慎水政以防止水以潴蓄
水以溝蕩水其法甚備自隄石而城無受嚙庶幾於
河之害遠矣而二渠之後亦借以收其利不佞三年
於此未事則憂物力方事則憂成勞已事則憂久遠

今幸三憂且釋得藉手告終事矣抑天下事惟賢者
能慮始其次莫若因是三後者因法於古因石於山
因力於民因能於衆因主裁於上獲追喜事之幸是
皆今日所以成功之本也例不可以無記遂次其終
始以系之銘銘曰渾渾經瀆亘以金隄順流而西潛
於靈府禔福下土聿鞏靈武爰固我圉用昌我稷黍
匪處白璧而崇紺蓋是維川后之仁俾無逢其菑害
亦越千禩曰寧以泰

沈猶龍河東兵備道張公去思碑記 靈州自秦漢以來或稱州或稱郡或稱軍與鎮城僅隔一河而東西兩道並建蓋其重也神廟之季天下紛然用兵矣廷議遴選才德宿望之臣分蒞九邊而曙海張公以按察副使飭河東兵備當是時遼左川貴並軍興多調邊兵為援繹騷無寧日本鎮援卒方遣行而悍丁金白張威等路殺領兵官偽署左右將軍焚掠而前遠近震駭公至固原聞變星馳進大書前導曰戍士

遠後誠可念即有所需何不以情請而輕蹈國憲且
父母妻子各在城而自貽族滅何也軍門發兵擒勦
汝進退何以自全幸本道未受事可開汝一面如悔
罪者速投戈隨本道蒞鎮以明無叛志也衆環跪而
哭聲震山谷間叩頭請死有流血者公隨路慰遣原
營安插而密擒渠魁寘之法寧鎮以安其定變有如
此者銀定賓歹擁衆牧邊聲言搶花馬池公曰彼素
利我市賞且中國無釁不敢叛可不勞師而服也因

計誘通事僧人宣諭朝廷恩威通事曰無他也意求
增歲賞耳公怒曰國家定制誰敢議增必欲增者當
決一戰後雖稽顙求貢豈可得哉乃勒兵令遍觀營
伍而縱之歸二部各誅帳下一人以謝過焉其制勝
有如此者熊經畧廷弼威震九邊得便宜調發有偽
充經畧使者勒取馬價傳鼓而入甚倨公曰鎮故市
馬然不取馬而價者何也其人曰道遠恐疲折價至
近闕買易為便耳公疑之簡故牒印文小異遂伏罪

其發奸有如此者鎮臨極邊武備盛而文事寡公攝
學政月有課歲有較朔望泮黌宮講業論道辛酉獲
雋疊雙邊方侈為盛事其育材有如此者復創設商
學以便商賈子弟肄業於是羣商輻輳歲課羨溢其
柔遠有如此者靈州瀕河而城歲費薪夫數千金以
禦河壬戌河大決居民屢夜驚議他徙公相度水勢
從十里外建石隄為一勞永逸策歲省薪價工役無
算而向所衝淤轉成腴壤其保障有如此者秦家渠

常苦涸漢伯渠常苦漲三農失業輟耒而嗟公築長
湃以護秦別開蘆洞以洩漢計疏渠道三十里復蕪
田數百頃而歲額驟增數千石時號張公堤又制
水戽利民灌溉號張公車其裕農有如此者公為政
大抵先事綢繆臨機制變聲色不動而指揮若神日
光如電坐堂上人從轅門外窺閃閃如雙燈故雖色
笑親人而人不敢干以私若夫內靖寇氛外銷邊釁
談笑折衝豈不賢於甲兵百萬哉公庚申以按察副

使受事壬戌長按察使甲子加右布政使履任六年而攝河西者再至乙丑凡兩考卓異擢巡撫都御史去先是城北有二賢祠祀楊公一清王公瓊以報脩邊之功也及公去任二年而鎮人思公之功不下楊王於是貌公像而三之更其額曰三賢今年春寧夏舉人張先春沙圻貢士沈諫等以計偕至京師謁予請為文以留公愛夫龍向奉命閱邊已疏公治狀入告所為聞且見之而非無徵不信者矣前二十年公

守雲間全活飢民數百萬獎育士類龍亦廁門下知
公非一日也又烏敢以不文辭哉今上即位公以少
司馬陳新政六要上嘉納召對行見秉中樞如王公
掌綸扉如楊公事業彪炳真堪鼎足而立矣公諱九
德字咸仲別號曙海浙江慈谿人登萬曆辛丑進士
南居仁三賢祠碑記 成天下事者豈不存乎其人
哉今之人見古人之豐功駿烈可傳後世者或邈瞻
廟貌未嘗不敬而慕之以為吾亦可以為此也及乎

臨事則又畏縮遜謝謂此殆有天授抑或遭時會之
便以成厥功而非吾所能及嗟乎豈古今人若是遼
絕哉昔武廟初楊公遠菴以都御史臨邊奏築延寧
二鎮長城為復東勝計會逆瑾阻之功雖未竟而先
聲馳塞外戎馬裹足及寘鐸謀叛就家徵起公鎮人
聞公至鬪氣百倍至則鐸已就擒遂留制三邊踰二
十年而王公晉溪位大司馬督三邊軍事循楊公之
緒拓城四百餘里夏人念二公功不忘合祠靈州城

北所由來久矣又百年而張公曙海以藩臬長備兵河東適陽侯鼓怒吞噬城闔民將棄厥居而巢窟是棲先是河屢決而東城亦屢避而東且迤北洪武以來三徙城矣張公曰若此是無靈州也城可徙而東水獨不可徙而西乎乃循河故道躬理畚鍤築石堤長六千丈初河流甚駛少投石則旋傾張公曰此力弱不能勝耳石能砥水水豈能浮石乎遂排羣議為艘者百從峽口運石積而頓投之一日罄八百艘石

堤克鞏河乃西徙城賴以全由前言之夏人之不捐
於鋒鏑楊王二公之所留也由後言之夏人之不汨
為魚鼈張公之所生也於是躋張公與楊王並祀旌
曰三賢嘻亦盛矣予因思兵猶水也治水與治兵孰
難意者隄猶水之城與水決而移民以避之猶兵交
而割地以求和也雖欲永保其不壞詎可得哉且疆
場之事吉凶存亡我與敵共者也或望塵而避焉若
夫驚濤迅湍一掃而為龜鼉之窟豈有幸乎況兵但

避其害而水更收其利張公又築長湃於秦渠開蘆
洞於漢渠使涸者有所蓄而滂者有所洩今兩渠間
翼翼或綠野如雲伊誰賜與至於挺而走險者感
片言以投戈是劉弘一紙書勝十部從事也狡焉啓
疆者懾天威而稽顙是趙充國以威信服罕开也業
業乎無形之長城也哉楊王振卓軌於前張公接芳
躅於後孰謂古今人不相及耶楊公諱一清丹徒人
王公諱瓊太原人張公諱九德慈谿人頌曰屹屹金

塙區分昂畢燧寢鋒銷天險是設文襄創始司馬紹
述倬彼二公俎豆有秩張公繼起循禹之跡昔也洪
流今藝黍稷買犢棄劍計安反側鼎鼎三賢貞珉永
勒

楊博甘州山南關記 甘州城北四十里有人祖山
內通瓦窰太平草湖諸寨外連硯瓦孤山木架諸墩
兩峯夾峙殆若紫荆居庸然敵騎每襲甘州率多由
此蓋敵衝也先是鎮守太監陳浩於硯瓦溝南嘗伐

石作疊水一丈四尺疊水之南又鑿石井深一丈許
丙申十月敵三萬騎突至疊水上不能踰遲回良久
始由城兒溝入烽燧所到藉以收保甘之人至今誦
陳浩之功不衰博撫政少暇得與副總兵吉象遍閱
諸隘東自東樂大口子灰溝烟墩大小盤道觀音山
抵逃軍溝西自紅牆青山小口子抵茨兒溝上下山
坂靡不究極幽顯稍有缺漏不舉之處尋即繕治如
法已而至人祖山博謂象曰丙申之後初不知有疊

水以故倉皇無以為計今若來人持東草可以飛渡
此險不足恃也必須大建關城屯兵戍守庶幾萬夫
莫敵之義象曰山形北仰南俯時值陰雨水瀰漫一
二丈前人不設關者惟恐其衝決故爾都司柳棟熟
知地利可令棟相度之棟承檄周爰咨諏三宿始還
曰石井迤南山有原如掌天造地設可以作關近
關更作疊水一道不惟可免壅淤之患自是重險疊
障矣時總兵王公繼祖甫至議亦合簡屬吏之精敏

者得指揮曹鳳千戶張勛董其事鳳與勛議曰是關
一成實為扼吭先制之計但役夫千人晨夕炊爨苦
於無水相與祝於神一日偶於巖石間掘地盈尺泉
流沛發役夫賴焉棟曰維漢壽亭侯關公自我明啓
運以來歲歲有功河右此泉靈異或漢壽亭侯錫也
請作廟以答神貺博曰善爰即關城之中構屋一楹
敬塑公象飾以丹青蔽以幃幕左鐘右鼓百爾咸備
輪兵三十人戍之官一人領之兼以司神之香火云

是役也肇工於嘉靖二十七年四月十又二日訖工
於是年六月十又九日關城高一丈七尺四面凡二
十丈有奇城墩三面凡三十丈有奇城有懸樓如矢
如翬頗為壯觀增舊疊水九尺通高二丈三尺新疊
水高一丈三尺尾長八丈斬城兒溝崖二丈廟之左
右小屋各二楹為戍兵棲止之所關之北山絕頂又
作一墩防敵乘高擊射且大書題諸關門曰山南關
其它工之微者不復具載後之守斯土者幸時加脩

濬俾勿壞焉

陳裴防邊碑記

關中出嶠函之西去今京師二千

七百里皋蘭大河所經與禹導水積石相接去關中
一千二百里而張掖去皋蘭復一千二百里酒泉尤
遠六百里撐突河外孤懸絕塞開一路以通西夷之
貢所謂斷北敵之臂義則次矣乃我境開拓於戎狄
之區而迤邐祁連北阻龍荒南遮青海西引陽關之
外瓜沙之墟皆自古氈毳息喙之區千里是途三面

鄰敵今之勝算不在於能逐之在能禦之耳禦之方
城守為上而河西城堡土沙鹹而制低薄全無磚石
券洞皆板門關無鐵窰之即頽燒之即煨乃知金墉
玉關徒為稱美全無事實也予歲丁巳夏以陝臬廉
訪奉命撫茲土大以弗稱為懼渡河即行四道各將
令於大小城堡俱築垣陴浚池湟券更甃石門表鐵
葉切慮近歲囊餽點首導以周丘攻城輒以鈎竿梯
繩繫架窰塏填壕洞堤鑿門燒櫓諸巧併力環以甲

騎層射陣人陣人不敢倚堞而瞰彼即毀堞登陣雖垣塹稍脩仍不足恃乃鎮城先築敵臺屹倚城外臺圍夾牆牆開放火器孔洞向外者遠擊出壕堤向兩傍者順城雉而擊孔洞留三層下層用石鑿孔徑五七寸可放將軍砲擊賊近城下者中層用水剗通中孔徑三四寸可放盞口諸砲擊賊附城而上者上層孔可放快槍強弩擊賊已攀近睥睨者每臺周圍洞孔開向八方而城每面六臺則火器往來交擊繞一

城矣鎮城先築東南面十二臺乃照式行各衛所城
堡各設四隅四座雖小堡亦各二座河西新設敵臺
一時僅千座以聯接不可無大墩因敵臺之式推廣
之先製木墩為式令各築大墩中建實臺用懸洞天
橋而上墩外築城垣四面暗砌鐵門放將軍大砲多
安放火槍孔券名曰鐵城迅擊臺復廣前墩之式於
墩之圍城外二隅建火洞砲眼敵臺二座臺制如城
堡者而差小厝火器向外點放二臺護城四面名曰

轟電却胡臺復廣前墩之式中建一臺即安火砲鐵
門券洞於臺之下通出四面以大將軍砲諸火砲向
外擊賊臺上有房多儲器糧臺中之底鑿井防久攻
困名曰玉空飛震臺復廣前墩之式中建墩臺四隅
築二實臺二虛臺虛臺中設火洞砲眼懸空安門置
梯從此以上下名曰風雷太極臺造轉軸翻拍鹿角
陷馬品字坑木鑽地網總名曰阨邊六險以城堡敵
臺雖增而守之不可無械乃造諸械一曰夜叉懸木

備併架一曰懸石併架一曰流星鐵飛砲并架一曰
鈎頭銃一曰鐵巨斧一曰四股飛叉總名曰守城六
將鎮城造一千二百座件衛所次之雖城堡小者亦
造六十座件計河西各城堡總造萬餘又鑄鐵飛砲
萬餘以諸械雖可守而行可為陣止可為營尤莫便
於火車乃竭智殫思先造飛輪遊办八面應敵萬全
霹靂火車一百輛召選家丁勇士千二百立一營考
火車陣圖為書付主者習演脩整舊旋風砲火車百

輒令洪水黑城等五堡共造百輛修整衝槍飛火獨
腳車四百輛諸種車通行各道各衛照樣製各千餘
輛安置兵火器各萬餘名為破虜三車以勝敵莫利
於火施而大砲尤可以擊厚敵破堅陣乃奏討京制
大將軍二將軍砲各十位三將軍十五位討京製烏
箭銃二十杆隨用火藥什物及皮袋藥規藥管等皆
備再行分巡道行局用京降式造烏箭銃造金剛腿
諸大砲連珠雙頭諸槍及鑄生鐵石榴砲共二千餘

行分守兵備三道各造砲數稱是再發價山西造快
槍等近千件以火器尤資於硝黃馬子行闔鎮地方
各焚硝各俾人赴局學製未幾各處俱能焚硝製火
藥藥逾數萬且令局鑄石榴砲一千餘鑄生鐵馬子
三萬各處俱令鑄鐵及磨石者而尤慮鉛則難繼泥
則易碎有獻計謂磁窯造磁子可多辦試之大小八
等堅圓光滑可用乃令鎮城燒百萬箇每萬箇量一
石今已造五十餘石行各道俱如式造先是委官向

京領年例硫黃逾年未返予遣騎督責廼領硫黃三千斤來而往晉省造火器者亦鬻硫黃二千斤至顧火器已夥煮硝更繁硫足配合鐵磁子盈屋堆積剩供習放於是河西火器雄甲諸鎮矣此皆分巡王副使繼洛協謀効力分守張參政玘兵備陳副使其學太僕寺黎卿堯勲咸資畫理諸務稍次第而總戎徐雙峯公仁適至將城垣敵臺未完者相與督責築完即議併堡浚壕凡闔鎮之堡城隘人少者歸大堡而

堡垣之趾俱浚壕深闊以三大為準足堪障禦予惟
在昔哲臣問學功業致極中和寅亮天地而今膺籌
邊之寄者祇從事於制度脩為之間雖悉心綜理未
免馳情機械宜乎來曲智之評而非輔世之畧然漢
之諸葛孔明宋之范文正稱百代殊絕人物諸葛之
治軍流馬木牛以供運餉制作精妙後世莫傳而營
成八陣開合奇正予觀魚復江邊之壘見者稱為天
下奇才文正之治邊通斥堠城十二砦細微纖悉予

觀其峽山之屯取水秘井偵卒間道舊迹故在也二公當中夏稍弱敵勢方張故於此求殫心盡職隨事補裨固開誠布公之運用先憂後樂之敷施豈可以煩細而議二臣哉不此從事而清談廢事沉湎玩時以惜陰為俗吏以名教為贅物卒至荒嫗墮落靡可收拾此晉魏之所宜戒而近世亦或崇尚浮虛論議空寂鉤竒延譽至目經畧為曲智彼自謂弃知之學不自覺其為不智之歸矣以若人而任之鎖鑰其能

克副哉後來者以茲為鑒庶脩此防邊之緒而不使墜焉矣

陳祥蘭州衛重疏水利記 天地之利於人者莫大乎水然必託諸人而後利始大焉吾蘭古金城郡密邇北塞城郭內外軍民屋廬不下萬餘區北逼黃河岸峻東西兩川田畝水不能上下經寧夏始渠引以佃以漁獲大利焉城西南水自馬寒山經阿干來者傍城直瀉黃河東去厥後守土者采衆謀乃於阿干

河鑿渠引水十分之三一自龍尾山麓經關王廟下
入灌東川田圃隨渠勢有力者置水碓焉一自西郭
入注東西南三面隍塹以固城垣禦突衝城北黃河
已當一面之天塹一自高崖子經古峯寺下入灌西
川田圃居民始獲利矣成化間巡撫都憲眉陽余公
以兩川水利微而弗能當歲旱欲倣寧夏漢延唐來
等渠於黃河上流引水以灌溉籌畫已具會轉佐部
回京未果既而水入西郭者亦湮塞隍塹久涸識者

病之今年秋總制都憲河間張公行部過蘭政暇注意舉廢遂允蘭州衛之請循西郭故道而疏通之復開小渠以利城居者餘悉由東郭出亦達於川甫彌月間而隍塹週滿城郭溝渠所經之衢巷凡官民疏圃暨藝業者無不沾其利然阿干之利固若此而黃河之利尤大焉矧吾蘭俗業耕牧而土地莫善於河北所謂金城沃壤千里者在是顧以數年邊備弛而敵侵擾耒耜不敢越河梁租賦竭產以盈數者非一

日倘後來者勢可為而時可舉購求余公之議以成之吾蘭之利不尤大與因併記之以俟

王鴻儒都察院題名記 甘肅在中原之西數千里當玉門陽關之內漢史稱為故匈奴渾邪王休屠王地予考之於書殆不其然昔唐虞都冀即今平陽帝都四距各五千里所謂弼成五服至於五千是也夏書亦曰黑水西河惟雍州燉煌在甘肅為極遠地而後漢志註乃謂燉煌去洛陽五千里則其去平陽又

不充此數矣且黑水又在其地昔商道既衰棄稷不
務不密處豳部之壤而猶曰自竄於戎狄之間周末
小雅盡廢四夷交侵畿甸之中尚有戎落況甘肅之
遠乎由是觀之甘肅在三代之前固中國諸侯封畛
也其疆域如此初漢武徙民或以關東下貧或以報
怨過當或以諄逆亡道後皆為衣冠大族名臣良將
策畫之士藝能之人累出其地石虎逞其兇逆氣吞
四海及敗於謝艾也乃嘆曰吾以偏師定九州今以

九州之力困於桀罕彼有人焉未可圖也其人材如
此酒禮之會上下相通政事寬厚吏民相親風雨時
節穀糴常賤盜賊稀少和氣之應賢於內郡其風俗
如此地廣民稀水草宜芻牧其畜為天下饒不但如
張天錫草響之對陳伯玉採玉之篇而已其土產如
此王莽末關東兵起竇融獨以河西殷富帶河為固
屬國精兵萬騎一旦緩急杜絕河津足以自守而可
為遺種之處其險固如此詩列十三風苟有所關繫

微如曹鄴猶錄於經不然雖吳楚之強大亦在所棄也後世之樂雖非古樂比亦各有取焉古今樂府兼收并包九州萬國所採無幾而郭茂倩所錄乃有燉煌樂西涼伎其聲樂如此即是數者而觀之夫豈可以荒漠其地而鄙夷其人哉明太祖高皇帝既定中原之五年命宋國公馮勝拓地西陲而甘肅始入職方氏自是而後率以宿將鎮守其地後復益以文臣保釐其所以南輯羌戎北禦胡虜西控西域城郭諸

國者無復遺算自是關中無事而海內晏然矣正德
戊辰內鄉胡公由山西左布政使進拜都察院右副
都御史被以璽書出殿茲土公至鎮與元戎勅使協
規一心蒐軍實繕甲冑積芻粟完亭障謹斥堠校旗
簡士號令精明而賞罰信必內足以固圉外足以遏
敵矣暇日因稽按故牘考求嘗巡撫於此者礪石題
名置於公署用存政績遠遣使幣而命予記之竊聞
自宋司馬溫公著諫院題名記而有忠詐直回可權

之說天下之論莫能易之予嘗以為中人之資可導而上下者以是懼之可也自利仁之士其為善也非誘之以賞其不為不善也非畏之以刑而況又有出乎利仁之士之上者乎題名之意疑不出此昔趙文子枚數晉之名卿而獨取士會謝混歷評族之子弟而深與弘微君子尚友千古之士而論其世必有所從違以為處身應事之則而況居邊州之雄鎮當國家之隆委前人之政或寬或猛或繁或簡通變適宜

各有攸當耳目之所睹記掌故之所藏錄尚可徵也
勒其名於石公務有暇召老校退卒指其名問其事
而訂其取舍之宜事會之來資以應卒不亦善乎此
與徒懼之以忠詐直回之跡而不示之以主善得師
之方者亦若有間矣公之意或兼出於此乎予昔與
公同遊於容思段先生之門每見公屬綴流連固已
服公之敏及公之仕也鳴玉禁庭均勞外服者二十
餘年益明悉天下事今茲持憲臨戎統制千里其機

神算畧雖非愚淺所能測知然緣此而求之亦可以
得其阡陌矣傳曰作而不法後嗣何觀公之作法矣
公行還朝此則當附涼州故事以為百世之觀云

趙時春典祀忠烈碑記 昔夏后氏之王天下也窮
河源濬弱水以叙西荒聲教被於流沙故全涼之境
遂屬雍州其後王畧寢微淪於西域漢武帝始播威
靈雷振西庭風行塞外表河曲而列四郡焚樓蘭以
震百蠻雖文德未稱而雄畧廟算巍哉邈乎按漢初

置涼部刺史郡太守令長丞官以治民都尉護軍護
羌諸校尉屬國官以捍邊後復有河西都尉行大將
軍權宜諸職異代因革雖名稱異宜要在強兵富民
而已地既僻遠衆雜羌回犬牙相錯怙力負強競銳
爭先人懷賁育之志喬峯四阻繚以大河黃沙白草
瀾漫連天風騎森列獸屯鳥散形擬金湯之險捍禦
秦雍聯絡西域襟帶萬里控制強敵勢居必爭之最
德隆後服道污先叛周被驪山之難漢列河津之營

唐設涇原之戍宋罷洮河之師小者稱公侯大者僭
帝王強弱相噬互為雄長積骸崇丘流血丹川代有
秦項之禍有明受命海宇內外各奠方位奉琛效順
惟臣惟妾絃誦之聲洋溢四表然猶建關設戍彪虎
之將熊羆之師恭布角張法固或渝時用刀斧鋤誅
鯨鯢威讓文告羽檄四馳故有策勲王府勒名石室
祚流子孫聞望無窮其效端可睹矣然則昇平之世
良臣布德以宣化搶攘之時勇夫陳力以除凶大節

既臨烈士隕身而敘義潤澤流於生民勤勞在於社稷五祀之典禮莫先焉而令血食靡備報享未稱僉以為歎嘉靖間釐定典禮百神裡祀或興或革具如經義於是甘肅撫軍趙君載祇承德意考據圖籍質諸見聞自漢迄於近代卓然可表者具以爵里姓氏檄下有司建忠節祠以報功崇德既而涼州始興營田都御史牛君天麟初設行院亦共惇厥典遂下憲副崔君允鳩工程作祠以落成蓋表其尤著者自孔

奮而下凡十八人北堂南嚮中分左右以差其次則
吳克忠慕弘義東序西嚮李晟丁剛西序東嚮兩廡
則指揮包翼等八人主書爵里姓氏具如式春秋祀
事如典制無或不虔牲將麗崔君屬時春為文以記
之時春惟古之忠臣賢士沒而廟食於其王者非惟
人心有所不忘且將使後之人見之者有所勸而興
起今諸君祀前人忠賢以示後人安知後人不有高
諸君之風復將以繼前人而示後人也法當為銘銘

曰崑崙西極實生大河千里一曲秦涼是過惟河萃
靈蛟龍龜鼉其光屬天寶藏興馬駿馳名馬沕沕如
泉國之所重以制百蠻基自漢皇邇乎神禹右臂既
渥九山實旅茫茫涼野遂通諸華張官置吏中外一
家紛紛五王陵籍魏晉凶德參爭居仁則潤叔唐衰
宋九州振動天人濟時百則咸正雲雷解屯旱極而
雨喁喁黎庶云胡不喜亦有僞豪能捍大患芟柞獍
梟救災止亂或勤王家奉以義勇有嘉折首不難不

悚是曰忠賢實惟文武名垂竹帛震耀今古帝畀重
臣來撫來巡佐以憲使保釐邊民既繩徽績爰脩祀
典佑啓後人永矢弗諼為臣思忠為政思賢佐我昇
平於億萬年

趙時春遊崆峒記 雍山之鎮維吳山之阪為隴其
西而北二百里為筭頭山涇水出焉涇出山放之花
平川四十里東於崆峒山之前峽至於山之東麓與
後峽水會循龍尾山之北十餘里至於龍尾始與彈

箏峽之水會而涇始大龍山下至平涼府十里而既而南北兩原廓然對峙而川始闊涇之水引而陟之兩岸以為磴為池為圃卉木茂而禽鳥聚則府城西北之勢愈增奇凡遊崆峒自城者西之自東郭者循城之北而會於西余家東郭而別墅距筭頭甚邇故凡崆峒之首尾能悉之崆峒得涇而勢愈尊蓋由鑿前後峽以疏涇而崆峒始寬出譬猶正人君子禮義以峻其防巍然莫屈彼淫夫小人望之而可知其卑

且陋故凡言崆峒者舍涇則無以見其尊凡遊崆峒
遵涇南岸道府西越乾溝銀洞溝經石頭塞西嶽廟
掠大峒山亂涇汭至於問道宮宮者軒后與赤松廣
成二子授受之所故以為名正德間有道流王翁自
號全真貌若七八十者頗自矜大然亦不能辟穀但
能啗巨豚肩粟至數升膊肘一壯酒飲百觥俗云解
為五龍轉降術其術亦非道流所甚異然王持此術
眩耀於士大夫間以居其貲將侈其宮羣執役者艷

而叔焉王斥其名以怖之盜懼敗露遂取其元以滅口素與王全真者爭執城市之惡少劾之獄又期年始獲真盜乃云云然其先枉死者已數輩矣今宮之後建一閣閣下為王全真像云江南有商遺疾得道士療之而愈自稱崆峒道士王全真命商肖像於崆峒以為報且彰其異此為其徒羞全真之死故設計以解之不足信由宮之北遂升前峽坡皆流石飛沙可四里許至山腰一巨石僵道左內有小石光圓如

月狀攀躋而倦者據石而休且飲再登一里許西壁
有石碑嵌岩間宋游師雄題名處夫王全真求長生
而橫罹天折游師雄欲得名而埋沒荒蕪可一為之
慨嘆又上穿蒼蔚歷曲盤如前途之半始得平地為
淳陀寺寺之後稍東高峯寺中峯益東之高峯為東
峯寺東峯之旁為眺豐亭亭之下去崖幾百丈有洞
焉皂鶴巢其中亭上坐則涇川南北山之流峙城郭
村塢之羅布烟雲花鳥之變態操之指掌而無遺故

曰眺豐眺豐之南曰南峯寺亦懸出涇之上中峯北
行半里有小岡岡上喬松六株崆峒之松以萬數皆
俯仰衆植中而此松獨迥然透出噫可敬畏也松岡
有小宇亦禪居北有二絕澗獨木為橋南橋丈餘北
橋倍之號仙人橋過橋登峻坡即北峯寺寺後萬壑
崢嶸幽巖莫測而一塔懸立其西北隅塔後下數仞
為丹穴穴實圯泐余昔曾遊焉思之可竦神也其西
南林木愈蘢鬱徑愈險捫藤蘿百折而上為西峯寺

西峯之右為故虎穴虎穴益西有冽泉大旱則微而
終不涸泉之上復里許登馬巘山真武廟廟之南平
視為三官廟其西仰攀為香山寺三峯崆峒之絕巘
下瞰眺豐五峯覽涇川南北三原若波浪之伏挫焉
真武廟之東直下滹沱寺為石蹬千百級折迴以數
十視諸徑為極艱曲余昔遊未之及今與大梁熊子
脩氏乃登之云熊子曰余昔遊嵩岱華升峨嵋絕頂
視此山互有異同其俱得稱為名山宜矣獨疑其靈

泉抱閼嗚呼世代往矣元化推移陵谷變易吾安知其終無是與吾安知其終無是與

皇清武全文芮谷諸勝記 芮谷距邑城二里出城西郊

由新柳灘北渡汭水桃柳夾岸畦園成列居民背山倚谷者十餘家曰芮谷莊莊行百餘步芮谷口直其東迴峯環抱隱不見谷中有溪水橫塞谷口卒不獲人蹊曰橫溪渡溪前一帶林樹迷離愴怳四顧如武陵人舟行入桃源曰迷谿林渡谿而北山麓靈湫湧

出深闊各數尺許禱雨輒應土人立碑祠之湫畔老
柳翳翳濃陰掩蓋望之翼然如亭復有勺泉福小深
列在柳蓋亭之西逶迤北向沂曲道以盤登經丘遶
谷數折至疊石橋橋中處山谷之半西接山門循扉
而入依山面勢建聖母宮於東構梵刹于西昔人稱
殿子坡自此始殿西北隅有沼渟泓荇藻交浮遊鱗
隱見其際曰化魚沼沼傍築室數楹燒鼎烹茗是曰
丹室室西崖次垂石如幕不厦屋而幷幪是曰幕石

洞又西則峭壁幽岩巖巖時遠處攀高臨壑最極者曰
摩雲頂側立數仞款跨而下覆者曰覆壁凌空峭崖
霽日淋漓滴岩平空作雨聲者曰懸崖浮雨若乃飛
泉瀑墜散布如珠則曰瀑珠晶晶瑩窟聚錯落如星
則曰聚星窟蒼倭玲瓏可與探奇挾秘則曰石穴藏
書水滴石受日久成穿則曰石穿處巨石臨隈獨坐
兀如則曰兀坐石水集渠成回曲可以流觴則曰曲
水渠中產螭泥潛而族類繁衍則曰螭渠鏤跡攬勝

美不勝書是曰芮谷深處稍南則巖石奇聳秀削不
成是為嶙峋石石上古栢挺生蒼枝老榦千百年如
是不聞消長榮衰自栢而南突於崖半苔石團結中
空外翠園亘盈尺有泉汜汜由苔石出繩貫股分森
然直注至底曰貫珠泉水石相搏響音激越目擊耳
聆言莫能喻芮谷諸泉當推此為第一泉上架梯鑿
石穿洞吐納烟霞反而扳乎北崖別為石洞者九安
神靜息萬慮屏除既下則由山門左側出觀積氷宮

諸晶莫不凝冰光怪離奇斯為最盛故有積冰之目
又北而東陡壁絕立水源瀟灑如櫛比如簾垂又如
濃露零落繹不絕脈瀑珠晶貫珠泉水勢更殊故
曰濃露崖崖下浚地為泉曰濃露泉泉東林木叢雜
途窮境阻緣木以濟聞山通道附藤蘿而北上曰攀
藤逕隨逕西轉更上一層曰更上坂坂行見峪石渠
摩盪獨臨峪口下聽濃露泉其音淙淙然曰俯聽峪
又西徐步忽至一所周迴履坦勢如平臺凭高遠眺

物無遁形遊人眼界至此曠然一闢曰曠觀臺臺南
東下削壁孤傲曰寄傲巖危石迭峙曰箕踞石又南
躡柳陌翱翔至縱遊原喘息俱定遊行間適無遭迤
躡躡之度原前昂首凌風屹立峯頭俯視汭水波洄
瀾湧直達湮川洋洋乎又一大觀曰觀汭峯由峯北
還下踐駝丘丘勢延袤有類偃駝既乃達橫豎嶺嶺
小而峻自成一岑益降而北急流澎湃磴折層翻曰
疊浪坡突兀無枝虬顏下垂曰覆渡柳鞠躬跨渡則

東至古槐峯槐歷年永根產連珠接峯使高桂日承
天撫槐憇止雖迥臨深谷險不可即而潛溪低樹莫
不獻技峯前爰為施斤鑿拓鳥路蜿蜒遞降厥步盤
跚曰盤跚坂坂盡及壑林深瀨爽任意所如曰縱壑
林林北羅渡布株聚蔭垂柯上蔽晴空下息人影時
方盛夏可辟暑而忘薰曰密林渡逆流上溯亂石稠
沓崑崙波瀉遙望疊石橋門如雲衢天闕非復人間
恒覲曰霸槎門順流而南則貫珠泉之水自縱壑林

來濃露泉之水自密林渡來皆交會於匯口紆迴旋繞東流為迴谿新蒲細柳雜植其間遊人每低徊久之不能去谿背有石雄踞如岡振衣登嘯不啻置身千仞之上曰振衣岡又東則碣石盤據左夾谿水轉而南流行經石磴湍折不可狎視曰碣石峽峽南谿坦其執委蛇俄至半流磐石中亘水分為二上開而下合曰盤石磧環石列坐容容可什八九飛觴泛月或曰如臨島或曰如登舟去磧數武谿行窮處層磧

繼之流并入而力加勇磅礴震撼瀾雪濤飛心目俱
為洞駭曰夏石衝此外則回巒屏其內烟樹彌其闕
谷口于是乎在佳境既盡能事復殫是曰觀止

宋琬重修秦州城垣記 隴以西為州者五惟秦為
最鉅官之所蒞為衛城環郭而為城者東西有四脾
晚相屬如聯珠南通巴楚北控朝那東則關山峻險
此為上游輳蹄絡繹冠蓋接武西則康居大夏燉煌
張掖述職修貢織皮採玉之使歲無虛日故其規模

闊壯麗譙雉櫓之雄非他郡所敢校陽九以來生齒
凋耗哀我黔黎鑿山穴谷麋鹿散而熊虎鄰也順治
甲午六月乙未坤維失馭陽驕陰奮載震載崩丘夷
淵實氓居蕩圮覆壓萬計屹屹堅墉壞為平壤三版
靡存跛羊可越余小子躬率吏民素服郊哭遍禱羣
望旁行原隰飛鴻爰集百堵斯作但城固遺堞疆圉
是憂夙夜徬徨當餐廢箸或曰楨榦之需鄉遂是徵
徒輦之後丘甸是問鈎金束矢之入可以庀材木焉

子大夫下尺一以令國人其孰敢不從余曰吾聞之也國有大祲咎在邦伯是以澤中之謠子皙與刺城築不以其時則春秋書之今天方降威俾我民不康厥居余小子省愆災往災患之不恤而興土工以召怨余則曷敢爰出匪頒之賜購杞梓于岷山已而遣健足括故園困廩以益之於是秦人乃謹知其非厲已也勝衣之男佔畢之士連肩跼跼負簣而趨郡守姜君身自編於畚鍤之間量廣狹準尋尺眎其勤窳

而先後之縮版既興憑憑登登曾未期月而厥工告成太子太保總督尚書金公憑軾天水顧而嘉之即日拜疏列狀以請詔增僉事臣琬秩一級賜蟒服知州臣光穎予紀錄嗚呼余于是而知

朝廷激勸之典與秦人風義之盛也夫詩雅所稱元黃朱芾之錫惟功德之顯燦者當之今微末小臣以區區版築之勞蒙天子之錫賚恩至渥也然小臣何功之有亦惟是父老子弟執公而急社稷之務故得藉手成事以免復隍之虞君

子謂是役也庶幾猶有小戎袍澤之遺義焉語曰
十人樹楊一人拔之此言成功之難今秦之為秦
其城郭峙如也其樓觀翬如也其館廨翼如也
其壇壝亭郭巍如也烟火萬家鳴吠之聲相聞也
皇華之使攬轡而至止幾以為未始有災焉而不知
余與姜君躬丁大厄筆路襁褓呼號于荆榛瓦礫之
場者秦之人實耳目焉後之君子念前人音羽之勞
軫兆姓阽危之苦御之以恕載之以寬為保障勿為

繭絲為韋珮勿為束濕二三子遺庶有豸焉不然者
雖金城湯池安知不鑿山穴谷相率而去我也世不
乏尹鐸召信臣其人因記城工之始末而並致相勗
之意如此

劉斗蘭州新建撫署題名碑記 粵稽在昔甘涼置
中丞以弔彈壓重疆域也我

朝中外一家率土普天悉入版圖治在偃武修文以底
三秦是以

皇上初御九五即歸兵事而以臨鞏肩之憂哉

聖謨矢文德以洽四國之道也余從青瑣特簡西陲啣敦
本安內之意拜

命而出式遙其行歷太華通關隴問津天漢爰抵五涼滿
目黃沙寒烟數點巖城一綫孤繫天垠且地瘠民貧
逃亡過半賦逋如山餉亟於雨余喟然曰

聖天子加惠元元無遠弗届逖矣西土咸荷炯鑒中也爰
殫力拮据如葺破屋如整亂絲如斧錯節請免積逋

三十萬奇奏可民命稍蘇越五年

上復量地酌官總九圍而計之劃然分陝又以寧夏平慶
裁歸甘屬仍

勅移駐蘭州宅中圖治余凜

顏咫尺夜不遑即進僚屬而謀之僉曰蘭蹂躪之餘未有
衙宇其何以息事而寧人無已惟故肅邸遺址可建
焉余惟捐俸經營而各司屬復量輸以襄厥成揮瓦
礫披荆榛鳩工庀材肇於春竣於夏於六月上浣而

視事是役也地取諸廢藩材取諸市易磚石取諸燼
餘夫匠取諸雇募不勞民不捐帑屹乎峙都會焉斯
役也慨然念南壘岫而北松山西玉門而東銀夏蜿
蜒數千里跨州郡者五十餘區半壁長城咸責匪躬
非穆之治劇之才而庸遺大投艱之任即黽勉從事
曷以仰答

宸衷哉或曰凡建公署必紀事題名昭茲來許蓋蘭為七
劇九達之地酒泉張掖武威湟中則班定遠趙營平

衛霍諸公之所開拓也回中原則李西平范文正之所經營聲教也摩雲岳麓雪山蟠塚則馬文淵虞升卿信與紀玠與璘之所馳驅固守也白豹烏侖賀蘭鳴沙則方叔南仲狄懷英种仲平之所築鑿招輯也曠古人豪赫赫若覩今

皇上奠萬世丕基毋俾往哲湔美於前余曰嘻之數君子後先相望良慕之重之敢謂車書萬里遂以優游塞太平乎顧名思義用是瞿瞿第名者實之賓也有其

實斯垂鑒勿替余固不敢不勉踵此意以商皇之俾
一代勲名紹休前烈光簡冊著旂常磨崖志美銘碣
紀功于不朽使此碑與臯蘭永峙而姓氏之芳當一
度之河清更有望於後之君子則今日擇言是為異
日之嚆矢也歟爰鑱石而記其事

許孫奎孫將軍碑記 孫提臺者喬木故家也康熙
壬寅公秉鉞來鎮甘肅是時海氛不靖厯

聖明西顧之憂公以世臣而膺重寄則保障兩河屏翰

三秦胥于一身是賴公勵精振刷不遑寧處剔軍政之蠹蝕汰冗食之贏卒簡才良以備扞禦核儲餉以資飽騰凡所以籌邊計而固封疆者靡不劃然畢舉而將士精強威令嚴整甘肅一鎮稱為天下雄藩矣由是海夷喪膽西羌寒心二十餘年不復萌窺邊之志者惟公之先聲有以奪其氣也嘗戒諸將曰河西戎馬之地兵民雜處兵戢則民安民安則國本自固況此一塊之土先經寇擾繼罹回殘焚焚子遺瘡痍

未復正宜安全而蘓息之或可以漸至起色也奈何
一意治兵而于此殘黎竟不曲為保護乎於是勸飭
文武衙門輕徭薄斂慎獄清刑利者興之弊者除之
即或纖毫有病於民民不敢瑣瀆者公聞之轉囑有
司立行剔草而後已蓋公胸懷豁達舉動光明雖屢
以民事忤當路者而屬僚同寮皆諒其大公無我之
心所以誠能動物而德孚于上下羣情也故駐節涼
州二十載井里市廛熙攘自如而民若不知有兵者

所謂兵戢民安而威令素行故如此至于因材器使
一秉至公吐賢豪之氣杜倖濫之門參將遊擊半出
部伍以至領節旄而專閫者接踵而起皆公造就提
拔為國得人之效班班可指數也吳逆之亂隴右諸
郡皆陷公提兵東渡所向成功靖遠平涼相繼收復
南安天水以次削平然師旅所經秋毫無犯室家廬
舍安堵如故至今靖遠諸處家戶祝蓋報公生全
之德有如此者底定後春秋有加而公撝謙自如好

賢樂善厚下親民二十載如一日也甲子歲奉

命提督三鎮移駐甘州公去涼三歲而闔屬官紳兵民思之而不能已也會奎視學來西按部至涼則有大靖所屬營員兵民以去思碑記來請余想夫公之在涼其湛恩汪濊之所被既深且久而涼人戴天而忘其高履地而忘其厚今去三載如嬰兒之失父母謂有能已於思者乎雖然甘州去涼五百里政令威惠可呼吸立至者甘與涼何分遠邇惟是公之功業在社

稷德澤在生民紓

朝廷西顧之憂莫疆宇磐石之固荃備員學職宜得珥筆而記其事以俟纂入史冊傳之後世為封疆大臣之鑑豈不爛然光大也哉公諱思克字復齋奉天之廣寧人

通智惠農渠碑記 黃河發源於崑崙歷積石經銀川由石北角而北繞鄂爾多斯六部落入黃甫川逾潼關會泗沂合淮歸海源遠流長而朔方一帶導引灌

溉厚享其利焉獨查漢托護地方沃野膏壤因漢唐
二渠餘波所不及遂曠為牧野我

皇上軫念寧夏為邊陲重鎮建新城設將軍領兵駐防

特命侍郎臣通智會同督臣岳鍾琪詳細踏勘嗣

命臣通智偕侍郎臣單疇書專董是役復揀選在部道府

州縣十五員

命赴工所分司其事又

奏請調取守備官弁武舉等十有二人共勸厥工乃相

土宜度形勢以陶家嘴南花家灣為進水口近在葉
昇堡之東南也黃流自青銅硤口而下支派分流至
此而滔滔汨汨順流遠引足溉數萬頃之田其渠口
石子層累底岸維堅由此而東北遍歷大灘擇地脈
崇阜處開大渠三百里口寬十三丈至尾收為四五
丈底深丈一二尺以至五六尺不等高者窪之卑者
培之引入西河尾並歸于黃建進水正閘一曰惠農
閘建退水閘三曰永護曰恒通曰萬全節宣吐納進

退無虞設永泓永固暗洞二以通上下之交流設彙
暗洞一以接漢渠之餘水正口加幫石固頭閘堅造
石橋則渠源不患沖決特建尾閘以蓄洩之外累石
節以鞏固之則渠稍可以永賴大渠口以東俱引灌
大渠水其田勢高處剗木鑿石為槽以飛渡漢枝渠
之水而東之仍不失其已然之迹西坂渠尾以南直
抵渠口其西岸不能歸暗洞之小退水特留穰洞放
之大渠一帶出之亦絕無漲漫之患任春葉昇二堡

為往來孔道於正閘覆造橋房旁列數楹可為守者
居兼為行者憩建龍王廟立碑亭以記工程並壯觀
瞻沿渠之橋二十有二西河之橋十六行旅往來賴
以普濟其枝渠四達長七八里以至三四十里者百
餘道均作陡口飛槽而戶口人民沿渠又各制小陡
口小權洞千餘道以相引灌自此溝塍繡錯二萬餘
頃良田無不霑足于渠之東循大河涯築長堤三百
二十餘里以障黃流泛溢於渠之西疏通西河舊淤

三百五十餘里以瀉漢唐兩渠諸湖碱水各開旁建
水手房四十二所以司啓閉遍置塘房三十七處稽
察邊汎而大渠長堤以至西河兼恃防護渠堤兩岸
俱夾植垂楊十萬餘本其盤根可以固泝岸其取材
亦可以供歲修至於東北隅一帶其地尤廣其土尤
沃改六羊河為渠一百一十餘里以佐大渠所不及
奏請建縣城二其一在田州塔南為新渠縣其一在省
鬼城西為寶豐縣立縣令以膺民社設通判以司水

利建學校以育人材置營弁以備防汎移市口于石
嘴漢夷皆便建城堡於山後守禦相資茲役也蒙

皇上特頒帑銀十六萬兩以為工匠車船一切物料之用
纖微不累於民肇始於丙午之孟秋工竣於己酉之
仲夏向之曠土今為樂郊復蒙

皇恩廣被又頒帑銀十五萬兩以為招徠戶口恒產耕種
之資由是億兆歡呼爭先趨附闢田園葺廬舍犁雲
遍野麥浪盈疇勤耕鑿者歌

帝力安隴畝者頌高深奏之

九重錫以嘉名曰惠農渠遐陬赤子盡戴

光天邊塞黎民欣逢

化日誠

國家萬年之基而民生世享之業也爰立石而為之記

通智

欽定昌潤渠碑記 雍正四年歲次丙午

皇帝命侍郎

臣

通智單疇書會督

臣

岳鍾琪經營查漢托

護地方開大渠以資灌溉築長堤以障狂瀾易畜牧
為桑麻者三百餘里但大渠之東北隅灘形廣闊水
難遍及有黃河之支流名六羊河者口形如列指沂
游數里復合為一迤邐而北經大小方墩越蒹蘆細
歷省嵬城而仍歸於大河沃野腴壤綿亘百餘里因
迤黑龍溝而西故水勢順下漫無停蓄不能引之灘
中河之下流遂淤率諸執事循其已然之迹順其勢
而利導之凡泮岸之傾圯者培之使平河流之淤塞

者濬之使通爰於渠口建正閘一曰昌潤閘外設退水閘曰清安使水有所瀉以備歲修堵口也內設退水閘曰清暢使水有所分以殺湍流漲溢也相地制宜分列支渠二十餘道中多高壤不能盡達復設逼水閘三曰永惠永潤永屏東之使其勢昂而盈科而進仍由故道以入于河諸閘既建俱跨橋以通耕牧往來正閘之上覆以橋房其旁則立有龍王廟碑記亭渠兩旁俱插柳秧資其根力以固泮岸自此啓閉

以時蓄洩有方而大渠以東遂無不溉之田矣

欽定名曰昌潤渠以昭示來茲垂之永久是役也用以仰副我

皇上仁育萬物無遠弗届之至意渠之兩旁良田萬頃比戶千家白叟黃童均沾

聖德青山綠水悉載

皇仁誠

盛世之弘模而萬年之樂利云

楊應琚新建慶祝宮記并序

乾隆三年八月壬辰新建慶祝宮成欣逢

聖天子萬壽之期文武寮屬將校盛服博帶聚於會城商賈士庶張目拱手歡呼動地癸巳五鼓官吏畢集咸次於位燈火如晝修陞飛闥雲布於上華旗鳳蓋金節析羽星羅於下鐘鳴樂奏蹀躞翼翼如對

丹宸猗歟盛哉既退西寧僉事應琚請紀其成詞曰

維甘寧八郡自軍興後檄書旁午文武士吏趨事不

遑故凡禮文典章略而未舉中丞奉

命泣止即詢朝

賀之所竟無專官曰官吏雖誠敬在心而億兆之觀瞻
國家之大典不可缺也爰擇地選官徵工儼役築高墉
礮巨礮伐木陶埴力協功速門闕崇闓殿楹棘翼表
道有坊待漏有舍邊陲之地亦可謂規模少備矣且
夫事貴因時值此邊烽已息海宇清和士庶無內外
之繇商賈有殷富之樂冠裳濟濟恪恭盡職正當修

明典禮以答昇平而朝

賀之所威儀首重尤不可緩書不云乎一人有慶詩曰
君子萬年此物此志也夫河水發於崑崙皓月盈於
南極維地維時

天子受祉百工稽首永勒金石四方來賀於斯萬祀知作
之所始

楊應琚西寧新集黑古擺羊戎九城堡碑記

背郡城東南馳一日二日抵雪山下為黑古城千戶

庄亦雜石亂思觀什扎巴擺羊戎甘都堂折而西百
五十里為河拉庫托渡河而南為康家寨皆古羌戎
地逼介諸番歲為商旅邊氓害以貽官憂今

天子即位之叁年前制府相國查公巡閱至郡余與古鄯
游擊將軍楊君垣條悉其事謂非就險建城設官增
兵不可以理制府毅然以俞奏

可適四年寧郡饑余任其責鉅細必躬親半歲未嘗蓐
寢小民幸免於轉死而少壯者不可俾以坐食爰請

於大府割工價六分之一加糧升六合以價自養以糧養家檄西寧靳令夢麟礪伯徐令志丙分督之始於四年之孟夏迄工於五年之仲秋完城堡九周回自一百二十丈至三百八十四丈咸相其陰陽依其巖阻隨其廣袤而成言言伋伋實墉實壑諸番悉縮項橋舌屏氣而伏起視四境羊牛滿野一童子牧之矣帑以兩計凡九萬四千九百七十廩以石計凡一萬四千八百增兵將益俸餼其為役亦大矣哉然小

民不以為勞度支不以為多皆仰荷

聖主寬大之德也嗚呼

國家設一官而帑廩增一費將以利民也地方設一官而百姓增一累以其有害也何謂利慎固封守撫番恤下是也何謂害鍵閉不修征私擾衆是也同一官耳利害如反覆手可不懼哉昔人云有其患而圖之無其具有其具而守之非其人皆足以致敗故紀其倣末以告後之司險者

甘肅通志卷四十七